

四庫全書

史部

欽定四庫全書

江南通志卷首二之一

聖祖仁皇帝詔諭

順治十八年

奉

天承運

皇帝詔曰惟我國家受

天眷命

祖功

宗德肇造丕基我

皇考大行皇帝盛德至仁英資大度續承歷數統一寰區  
恩澤洽於多方政教臻於上理方期邦國永底雍熙不  
幸奄棄臣民遽升

龍馭顧茲大寶屬以藐躬朕兢兢在疚本不忍聞而諸王  
貝勒大臣文武官員人等僉謂神器既已攸歸天位不  
宜久曠堅請再三朕是以俯徇輿志勉抑哀衷於是月

初九日祇告

天地

宗廟

社稷即皇帝位仰惟

上天眷祐之篤

祖宗付託之隆涼德沖齡膺茲重寄敬圖覲光揚烈用紹  
無疆之休其以明年為康熙元年與天下更始式行舊  
恩聿宏新化所有合行事宜開列於後

康熙十七年正月二十三日

諭吏部自古一代之興必有博學鴻儒振起文運闡發經史潤色詞章以備顧問著作之選朕萬幾時暇遊心文翰思得博洽之士用資典學我朝定鼎以來崇儒重道培養人材四海之廣豈無竒材碩彥學問淵通文藻瑰麗可以追踪前詒者凡有學行兼優文詞卓越之人不論已未出仕著在京三品以上及科道官員在外督撫布按各舉所知朕將親試錄用其餘內外各官果有真

知灼見在內開送吏部在外開報於該督撫代為題薦  
務令虛公延訪期得真才以副朕求賢右文之意爾部  
即通行傳諭遵行特諭

康熙二十三年十月二十五日

諭大學士明珠王熙明太祖一代開創令主功德並隆朕  
巡省方域將及江寧鍾山之麓陵寢斯在朕優遇前代  
况於其君實賢可祀之如禮內閣禮部太常寺會議具  
奏

康熙二十三年十一月初二日

諭大學士明珠總督王新命明太祖陵寢歷經年世幸本朝加意護守鬱然無恙朕躬詣奠祭典數優崇今車駕將旋圖善其後爾等可傳諭守陵太監及陵戶朝夕敬慎巡視罔輟灑掃維勤毋令附近民人旗丁恣行蹂踐其在陵守視人等特加賞賚以示恩恤彰勸厲焉特諭

康熙二十三年十一月初三日

諭江南江西總督江蘇巡撫明太祖天資英武敷政仁明

芟刈羣雄混一區宇肇造基業功德並隆其陵寢在鍾山之麓係江寧所屬地方向已有旨令有司各官春秋致祭嚴禁樵採并設有守陵人戶朝夕巡視但為日已久不無廢弛今朕省方江寧親詣拜奠見牆垣傾圯林木凋殘皆係無知民人不遵約束恣肆作踐往來行走殊違法紀嗣後爾等督令地方各官不時巡察務俾守陵人役用心防護勿致附近旗丁居民仍前踐蹋所有春秋二祭亦必虔潔舉行以副朕崇重古帝王陵寢至



意特諭

康熙二十三年十一月初四日

諭吏部尚書伊桑阿

恭紀河渠志

康熙二十三年十一月初四日

諭江南大小諸臣朕向聞江南財賦之地今觀市鎮通衢似覺充盈其鄉邨之饒人情之樸不及北方皆因粉飾奢華所致爾等身為大小有司當潔己愛民奉公守法激濁揚清體恤民隱以副朕望老安少懷之至意

康熙二十四年二月初四日

諭按察使于成龍 恭紀河渠志

康熙二十四年十一月初四日

諭戶部朕惟自古帝王統一寰區懋先德化必子惠黎元  
勤求民瘼俾幹止寧成家給人足而後世躋雍熙治登  
上理朕御極以來宵旰圖治未敢即安念切民依思培  
邦本雖編氓漸得遂生而閭閻正資惠養欲使羣生樂  
利比戶豐盈惟頻行減賦蠲租庶萬姓得沾實惠前此

用兵以來河南湖北兩省民人轉輸供億勞費繁多特沛仁恩以昭軫恤所有康熙二十五年應徵地丁各項錢糧著與蠲免一半其康熙二十四年未完地丁錢糧亦著盡與豁免又直隸獻縣河間縣河間衛江南宿遷縣興化縣邳州高郵州鹽城縣山東郟城縣魚臺縣地方今年重罹水災小民艱苦亦應加恩軫恤所有康熙二十四年下半年二十五年上半年地丁各項錢糧俱與豁免爾部速行該地方官通行曉諭務使人人均被

恩膏以副朕愛育蒼生至意如有不肖有司官役借端  
朦混及私行重征者該督撫指名題叅從重治罪如該  
督撫徇隱不行糾舉或經叅奏或被告發定行一併從  
重治罪爾部即遵諭行特諭

康熙二十五年閏四月二十二日

諭大學士勒德洪明珠王熙吳正治宋德宜學士麻爾圖  
牛鈕禪布蔡必漢噶思泰朕聞鳳陽徐州等處地方亢  
旱人民困苦學士麻爾圖率戶部賢能司官一人馳驛

速往詳明據實踴看果民食維艱窘於生計速發鳳陽倉銀米一面賑濟一面奏聞其賑給事宜麻爾圖會同戶部議以聞

康熙二十五年七月初四日

諭工部右侍郎孫在豐

恭紀河渠志

康熙二十六年十一月二十六日

諭戶部朕惟自古帝王統御萬方又安九有單心懷保節愛攸先期於物力充裕爰以振業黎元俾膏澤旁流咸

蒙美利朕自御極以來軫恤民依力圖休養惟理財為裕國之大經蠲貸為愛民之實政歷年敦崇節儉嚴核浮冒蓋欲為布德行惠之資頻年以來各省錢糧雖已次第蠲免但江蘇所屬各郡縣為財賦重地額徵錢糧甲於他省且累歲輸將供億効力維勤茲用大沛恩膏除漕項錢糧外所有康熙二十七年應徵地丁各項錢糧俱著蠲免二十六年未完錢糧亦悉與豁除又陝西省錢糧前雖已行蠲免但念該省人民用兵之際轉輸

餽餉効力可念再宜加恩以宏樂利其康熙二十七年應徵地丁各項錢糧及二十六年未完錢糧亦著俱與蠲免爾部速行該地方官通行曉諭務使小民均霑實惠以副朕愛育蒼生至意如有不肖官吏借端朦混及私行重徵者該督撫指名題叅從重治罪如該督撫徇隱不行糾舉或經叅奏或被告發定行一併從重治罪爾部即遵諭行特諭

康熙二十八年正月初二日

諭吏戶兵工四部朕統蒞寰宇二十八年於茲早作夜思  
勤求治理務恤黎庶永圖乂安如黃運兩河運道民生  
攸係朕日切心勞比年工役雖漸有緒而應修應塞議  
論紛紜曩歲巡幸曾允淮揚士民所請疏濬下河前已  
興工尚稽底績屢經廷議請朕親行閱視今特諏吉南  
巡躬歷河道兼欲觀覽民情周知吏治所至沿途供億  
皆令在京所司儲備一切不取之民間即有日用應需  
該衙門於所在地方照市估平買不許錙銖抑勒小民



猶恐地方官吏不能悉體朕懷借名苛派供應今特頒諭嚴飭如有悖旨借端私征者察實即以軍法從事地方文武大小官員不許與扈從官員指稱交戚輒通餽遺違者餽送收受人員並以軍法從事其扈從大小官員及隨往僉役如有橫行生事擾民者一并從重治罪朕茲巡省原以軫恤編氓咨諏風俗凡經過地方百姓各安生業務令屢無廢市隴不輟耕毋得倉皇驚避輒滋煩擾其軍民人等懷奸挾詐希逞私憤擅於駐蹕處

所瀆行告訐者一概嚴禁儻有妄控除所告事不與准  
理外仍嚴加治罪爾部即傳諭扈從大小官員人等並  
行令各該督撫於府州縣城市村莊窮鄉僻壤徧懸告  
示備行曉諭務令通知以副朕惠愛元元至意特諭

康熙二十八年二月

諭總督傅臘塔王隲巡撫洪之傑金鋹朕因省察黎庶疾  
苦兼閱河工巡幸江南便道至浙觀問風俗簡約儀衛  
鹵簿不設扈從者僅三百餘人頃經維揚民間結綵歡

迎盈衢溢巷雖出其恭敬愛戴之誠恐致稍損物力甚  
為惜之朕視寓內編氓皆吾赤子惟使比戶豐饒即不  
張結綵幔朕心亦所嘉悅前途經歷諸郡邑宜體朕意  
悉為停止又見百姓老幼男婦奔走雜還瞻望恐後未  
免喧譁擁塞念此行原以為民不嚴警蹕但人衆無所  
區別高崖水次或有傾跌之虞一夫不獲其所足軫朕  
懷此後止於夾道跪迎勿得紊亂追趨致有諸患著即  
詳加曉諭使知朕愛民切實咸為遵行特諭

康熙二十八年二月十一日

諭扈從部院諸臣朕稽古省方咨求治理閱視河道期底  
平成凡有利於民生必令需夫實惠茲行次浙省禹陵  
在望念大禹功德隆盛萬世永賴應行親詣以展企慕  
之忱其致祭典禮所司即察例舉行政治所先在崇文  
教江南浙江為人文萃集之地入學額數應酌量加增  
永昭宏獎著該督撫詳議奏請江寧鎮江杭州駐防滿  
洲漢軍兵丁鎮守要地久歷歲時深用軫念應作何恩

賚以彰優恤著該部議奏自南巡以來所經過地方官員除八法處分及列款糾劾外凡因公誥誤降級畱任者俱准與開復降級調用者著帶所降之級畱任其經過地方見在監禁人犯除十惡及詔款所不赦等罪並官員犯贓不宥外其餘自康熙二十八年二月十一日以前死罪及軍流徒罪以下已結未結俱著寬釋以示朕赦宥過之意備辦船隻地方各官効力勤勞著該督撫會同奉差官員確查具題各加一級繹夫供役勞

苦亦著該督撫察明人數量給恩賞朕屢念民依特蠲  
租賦總期實德潤澤蒼生近見民間有建立碑亭稱頌  
德意者雖出羣黎感戴之誠但恐各郡皆然未免致損  
民力誠使閭閻殷阜則裨益良多碑亭何與焉嗣後亦  
宜停止江浙錢糧既經蠲豁猶慮有不肖有司借端詞  
訟朘削民生著該督撫嚴行禁飭至各處權關原有則  
例朕舟行所至諮訪過關商民每不難於輸納額稅而  
以稽留關次不能速過為苦權關官員理宜遵奉屢頒

諭旨恤商惠民豈可反貽商民之累自今應力除積弊  
凡商民抵關交納正稅即與放行毋得稽留苛勒以致  
苦累違者定行從重處分朕早夜孜孜惟冀官吏軍民  
士農商賈無一人不獲其所故於民生吏治圖維區畫  
務極周詳爾等可即傳諭俾一體奉行稱朕意焉特諭

康熙二十八年三月二十一日

諭內閣朕巡行南省往視河道江南淮安諸地方自民人  
船夫皆稱譽前河道總督靳輔思念之不忘且見靳輔

濬治河道上河隄岸修築堅固其於河務既克有濟實  
心任事勞績昭然曩革職太過其以原官致仕例復其  
原品

康熙二十八年七月二十二日

諭戶部朕前巡幸江南凡所經歷於編氓疾苦必詳加體  
察如傷念切每沛恩膏朕過邳州親見彼處田地多為  
水淹沒耕耘既無所施賦稅如何取辦其現在被淹田  
畝應納地丁及漕項錢糧俱行蠲免歷年逋欠亦盡與



豁除該督撫即行出示徧曉窮鄉仍不時廉察儻有不肖官員仍行私徵者題叅從重治罪以副朕愛惜民生至意爾部即遵諭行特諭

康熙三十年十二月初四日

諭戶部朕撫馭區宇三十年以來早夜圖維惟以愛育蒼生俾咸臻安阜為念比歲各省額徵錢糧業已次第蠲豁其歲運漕米向來未經議免朕時切軫懷所有京通各倉米穀樽節支給數載於茲今觀歷年儲積之粟恰

足供用應將起運漕糧逐省蠲免以紓民力除河南省  
明歲漕糧已頒諭免徵外湖廣江西浙江江蘇安徽山  
東應輸漕米著自康熙三十一年始以次各蠲免一年  
至江寧京口杭州荊州大兵駐防地方亦應豫行積貯  
著將康熙三十一年起運三十年漕米各截留十萬石  
存貯倉廩令該地方官敬慎守視以備需用爾部即遵  
諭行特諭

康熙三十二年九月十六日

諭內閣江浙二省今年夏旱雖不成災秋收量必有限若漕糧照常徵收起運恐民食將至匱乏朕為此常切軫念除浙江漕糧已經改於今年蠲免外其江南漕糧今年或三分免一或免一半俟至該省應蠲年分將今年所免米石照數補徵起運於漕糧既無缺少官民大有裨益著滿漢大學士等會同戶部堂官倉場侍郎等作速確議具奏

康熙三十三年閏五月初十日

諭內閣保護中河堤岸之子堤 恭紀河渠志

康熙三十六年正月二十二日

諭大學士伊桑阿等揚州淮安徐州等處被災錢糧該總督巡撫奏請蠲免疏至即與全蠲

康熙三十六年六月十五日

諭提督江南學政學士張榕端提督浙江學政侍講張希良自古帝王治天下率以興賢育才為首務稽察前制各省學政皆用詞臣董率之任至重也近來士習未變

文事未彰良由督學各官不能仰體朕意茲特命爾前往江南浙江等處提督各府州縣學政爾尚端軌儀崇經術勤勸課嚴坊刻振維新之典革積衰之弊毋炫華而遺實毋避怨以市恩俾士有真材國收實用南土人文所萃尤宜加意作新多方鼓舞以稱朝廷培植人材至意所屬司道府州縣及提調等官凡關係學政者聽爾據實考核及禮部題准申飭事宜俱當著實舉行向有傳諭嚴禁考試情弊爾當恪奉遵依至於本處督撫

各有攸司不得互相干預如遇公事交接暨文移往來俱照平行其布按都三司接見禮儀往來文書有干係學政者俱照巡撫衙門例行爾受茲委任務嚴絕情面一秉虛公振拔孤寒澄汰汙賤教士有程取文有法俾士風丕變時惟爾功如或蹈常襲故違命曠職亦惟爾罰爾其慎之故勅

康熙三十六年十月十五日

諭內閣下河地方

恭紀河渠志

康熙三十七年十一月二十五日

諭戶部淮安揚州鳳陽等處比年水患頻仍浸漫隄岸田  
多淹沒耕獲無從百姓艱於粒食經朕時加軫恤屢賑  
屢蠲被災地方賴以安堵但念久歉之餘恐致資生匱  
乏朕廑憫殷切未嘗稍釋於懷前此雖頻敷庠澤至再  
至三用禪羣黎生計猶恐開春東作農事艱難若不大  
沛恩施安能令小民各得其所著將海州山陽安東鹽  
城高郵泰州江都興化寶應壽州泗州亳州鳳陽臨淮

懷遠五河虹縣蒙城盱眙靈璧等州縣并被災各衛所  
康熙三十八年一切地丁銀米等項及漕糧盡行蠲免  
務使民間均霑實惠以副朕體恤元元生息愛養至意  
爾部即遵諭行特諭

康熙三十八年正月二十一日

諭吏戶兵工四部朕撫馭寰區又安中外孜孜圖治宵旰  
勤民期於天下咸遂生成物無不得其所今邊烽永靖  
四方無事獨是黃淮為患衝決時聞下河地方田廬漂



沒朕軫念民艱曩曾屢遣大臣往令督理不惜數百萬帑金務期早綏黎庶乃歷年已久迄無成功今水勢仍復橫溢漫漫城閭沉沒隴畝以致民多失業董其役者未有上策可以宜民時厯朕懷未嘗少釋在內諸臣咸請朕親臨指示以為一勞永逸之圖方今春時雨水減少正宜講求疏濬以遼安瀾爰諏吉南巡親加勘閱更以吳地乃東南奧壤襟帶江湖勵俗省耕兼行臨視凡一切往返供億已皆併辦於京師即途次日用所須亦

令各衙門照本地時值採買總於民間一無所累仍恐沿途官吏藉名科派致累閭閻故特頒諭嚴行申飭如有悖旨假託派索者察實即以軍法從事該地方大小文武官員不許與扈從官員藉稱親舊擅相饋遺違者與受人員並以軍法從事其扈從大小官員隨行儉從人等如有橫行生事者一併從重治罪凡經過地方百姓各安生業皆如常時務令屢無廢市隴不輟耕毋得惶遽引避其軍民人等懷挾私怨受人指使擅於駐蹕

處所輒行告訐者一概嚴禁不准仍照衝突儀仗例嚴  
加治罪爾部即傳諭扈從大小官員人等併行各該督  
撫於各府州縣城市鄉村遍張告示備行曉諭務令億  
兆通知以副朕體恤惠愛至意特諭

康熙三十八年三月初七日

諭戶部朕君臨天下期於黎民樂業各獲其所凡興利除  
害之事靡不舉行蠲免賑濟之恩靡不下逮比年以來  
因淮揚所屬地方疊罹水患業已歲蠲額賦賑恤頻施

又動支數百萬帑金責令在河諸臣於應挑應築之處酌量修理務使氾濫之水匯歸入海被淹之廬舍田畝盡皆涸出用底幹寧乃錢糧竟爾虛費卒不能使積淹有歸田廬未涸民生未遂朕聞之惻然軫懷值茲四方無事之時欲將一切修舉事宜詳閱指示用是躬親臨幸沿途審視黃河水勢咨訪地方父老比至歸仁堤高家堰量度地形高下應挑應築一一明示河臣惟是被淹地方米價騰涌生計維艱朕目擊民依深用厯念著

將漕糧截留十萬石於高郵寶應興化泰州鹽城山陽  
江都受災七州縣各留一萬石悉較時價減值發糶餘  
米三萬石著於邳州留八千石宿遷桃源清河安東四  
縣各留五千五百石亦較時價減糶此各州縣發糶之  
米著就近交與漕運總督河道總督邳州著遣司官一  
員前往監視再截留米十萬石於揚州淮安各收貯五  
萬石這應留漕糧不論何處米石著就近截留爾部即  
遵諭行

康熙三十八年三月初七日

諭總督于成龍恭紀河渠志

康熙三十八年三月十三日

諭戶部東南為財賦重地朕時加軫念頻歲以來雖在邊塞用兵之際未嘗不早夜殷殷矐懷寬恤茲以中外昇平特事巡省並閱河工比至江南親察民間饒瘠之狀見淮南北地方疊罹水患深用惻然已經屢蠲屢賑仍命截留漕糧減價平糶其餘各州縣固市肆安輯耕鑿

恬熙而額賦浩繁民生拮据歷年逋負積算日增合計  
江蘇巡撫安徽巡撫所屬舊欠帶徵錢糧幾及百萬念  
小民方供新稅復急舊逋物力維艱勢難兼辦里井既  
多催科之擾官吏復滋叅罰之煩應沛特恩概行蠲豁  
除康熙三十三年恩詔內已經赦免外其三十四五六  
年奏銷未完民欠一應地丁錢糧米豆麥雜稅爾部行  
文該督撫察明俱著免徵務飭有司悉心奉行俾使窮  
簷蔀屋均霑實惠如有已徵在官詭稱民欠希圖侵蝕

肥己者一經發覺定從重治罪朕身處宮禁與巡歷方隅無非孳孳民事但使閭閻豐足則國家裨益良多以此不惜蠲除頻敷德澤凡厥官吏軍民宜咸知朕意爾部即遵諭行特諭

康熙三十八年三月二十二日

諭戶部朕因淮揚地方數被水患躬臨巡省目擊田廬塗沒之苦深加軫恤既截留漕糧以濟民生仍蠲除積欠以紓民困其昨歲淮揚兩屬被災錢糧曾經該督撫具



題部議照例減免三分今念百姓餬口維艱安能辦賦  
應破常格用沛特恩淮安府屬海州山陽安東鹽城揚  
州府屬高郵泰州江都興化寶應九州縣並淮安大河  
二衛康熙三十七年未完地丁漕項等銀一十九萬有  
奇米麥十一萬石有奇著全與蠲免爾部行文該督撫  
即飭各州縣張示曉諭務體朕憫惻羣黎之至意俾窮  
鄉僻壤均霑實惠如有不肖官吏私徵侵蝕者察出定  
治重罪特諭

康熙三十八年四月初二日

諭戶禮二部朕子育黎元勤求治理日孜孜以施德澤厚  
民生為急務而江浙二省尤東南要地朕時切軫念比  
歲以來蠲豁田賦賑濟凶荒有請必行無災不卹雖漕  
項錢糧向未蠲免者亦曾特旨蠲免愛養之道備極周  
詳庶幾民生日益康阜用是乘輿時邁於視河事竣巡  
歷江浙咨訪民間情形見淮揚一路既困潦災而他所  
過州縣察其耕獲之盈虛市廛之贏絀視十年以前實

為不及此皆由地方有司奉行不善不能使實惠及民所以小民雖懷愛戴之誠而朝廷恩澤卒未下究朕目擊屢懷亟思拯卹截留漕糧寬免積欠另有諭旨惟各鹽差關差向因軍需繁費於正額外令在差官員以所私得贏餘交納充用今思各官孰肯自捐私橐勢必仍行苛取商瘠民困均坐此弊著將加增銀兩一概停罷以紓商民之累其兩淮鹽課康熙三十六年曾加增四十萬兩今恐商人辦課維艱有漸致匱乏者著減去二十

萬兩此外有應行應革事宜朕還都以後仍加商確次第舉行該督撫藩臬皆地方大吏亦著悉心體訪凡有可為民興利除害者作速勘實陳奏嚴革雜派禁止刁訟然後胥吏不能作奸良民得以安業儻官吏有悖旨妄行者許商民首告該督撫察出即行叅奏朕視民如傷惟恐一夫不獲其所茲值海寓昇平兵革不事正當與民休息之時故特渙沛德音減徵寬稅以為閭閻留有餘之力萬一嗣後別有急需或不得已而稍議加增

想在小民亦能共諒朕懷輸將之恐後也至於江南浙江人文稱盛入學名數前已酌定增額今著於府學大學中學小學各增五名舉行一次以示獎勵人才至意爾部即遵諭行特諭

康熙三十八年四月十六日

諭戶部朕巡幸江南遍察地方疾苦深知民間生計艱難故將通省積欠錢糧盡行蠲免所過州縣有被災甚重者俱經拯濟務俾得所茲聞鳳陽府屬去歲潦災甚重

是用破格加恩以示優卹康熙三十七年該府屬壽州  
泗州亳州鳳陽臨淮懷遠五河虹縣蒙城盱眙靈璧十  
一州縣並泗州一衛未完地丁漕項等銀米著一概免  
徵爾部行文該督撫卽飭該地方有司張示曉諭令窮  
鄉僻壤咸悉朝廷曲軫災黎之至意如有不肖官吏恃  
旨私徵使百姓不需實惠者察出定治重罪爾部卽遵  
諭行特諭

康熙三十八年十一月初五日

諭戶部朕思小民生計惟農畝是賴必年穀收成斯衣食無缺淮揚所屬海州等州縣衛接年河流浸漫田廬編氓艱於粒食朕心深切軫念已將康熙三十八年錢糧俱行蠲免今春南巡目覩民間疾苦恐致失所復將康熙三十七年未完錢糧盡與豁免除諭令所司將沿河堤岸堅固修築乃修防未竣夏秋又致沖決田廬盡沒水中特命該撫往駐被災地方動支積貯米穀並將漕糧截留親行賑給今念清口河流未通民田仍遭淹沒耕

獲無從百姓饘粥尚且艱難來年租賦安能輸辦著將  
這被災海州山陽安東鹽城大河衛高郵泰州江都興  
化寶應等州縣衛康熙三十九年地丁銀米等項及漕  
糧漕項銀兩盡行蠲免爾部速令該督撫通行曉諭務  
俾均霑實惠以副朕拯卹災黎至意如有不肖官役朦  
混侵冒仍行私徵者該督撫嚴察指叅從重治罪爾部  
即遵諭行特諭

康熙三十九年三月初二日



諭戶部淮揚等處百姓頻年罹於水災未寧幹止朕心時切軫念比歲以來多方優恤蠲免賑給靡不舉行去年春朕親履河干目擊小民田廬皆被滄沒災黎艱於粒食益為憫惻於懷爰命地方官按戶賑濟又將截留漕糧發賑平糶俾得贍養上下兩隄岸前雖屢發帑金修築迄無裨益去年二月面諭河工諸臣速行修治至今尚無成效復遴選廷臣同往經理無非軫懷民瘼欲令黃運兩河隄岸速成斯民早安生業耳念水患一日不

除則百姓一日不得耕種用是深以為慮著將今年漕糧截留二十萬石存貯淮揚地方備用爾部即遵諭行特諭

康熙四十二年二月初七日

諭河道總督張鵬翮

恭紀河渠志

康熙四十二年三月初二日

諭河道總督張鵬翮

王公堤

康熙四十二年三月初三日

諭河道總督張鵬翮

高堰工程

康熙四十二年三月初三日

諭河道總督張鵬翮

王家營

康熙四十二年三月初四日

諭河道總督張鵬翮

清口西壩

以上恭紀河渠志

康熙四十二年三月十八日

萬壽恩詔朕為天下生民主宵旰勤勞勵精圖治凡國家

之休戚閭閻之樂利晷刻之間無不注意於此天下之

大兆民之衆朕誰欺欺天乎至今四十餘載親歷饑饉者不知其幾南北用兵者不知其幾人心向背者不知其幾天變地震者不知其幾自責涼德不能撫育履冰臨淵兢業惟守仰賴

上天眷佑

祖宗厚德幸生創業未久之際方免墜失今海寓昇平年歲稍和生民俱已樂業邇來諸王大小臣工士庶因朕五旬輿情肫切屢請加上尊號朕堅意固辭不允所請

蓋朕不以名譽稱揚為尚惟以海內富庶為心是以屢  
蠲賦役頻省刑罰總欲使老安少懷風俗淳厚漸幾於  
康乂隆平之治近因淮黃告成乃東南要務再授方略  
望有善後朕不辭勞瘁親往閱視見畿輔山左江浙等  
省耆老人民俱中心愛戴雖童穉亦咸歡欣瞻仰是知  
民心皆一用是益深軫念視切如傷所以星夜回鑿茲  
特大沛宏恩普施遐邇庶幾民生咸登壽域和協徧滿  
寰區所有應行事例開列於後於戲安民則惠益宏逮

下之恩御衆以寬聿溥好生之德布告天下咸使聞知

康熙四十二年十月初八日

諭工部覽河臣奏一道

恭紀河渠志

康熙四十五年十月二十五日

上諭戶部朕子育黎元日求所以休養利濟之道念惟賜租減賦實有裨益於民生直隸各省錢糧次第全蠲一年者業經數舉獨是歷年逋負積累加增舊稅新徵勢難兼辦縱使少寬民力分年帶輸而督令續完仍多拮

據朕矐懷及此深切軫恤是用蠲逋已責大沛恩膏俾閭閻獲免追呼官吏亦不罹叅罰直隸山東積欠錢糧今年俱已蠲免其山西陝西甘肅江蘇安徽浙江江西湖北湖南福建廣東各省自康熙四十三年以前未完地丁銀二百一十二萬二千七百兩有奇糧十萬五千七百石有奇著按數通行豁免或舊欠已完在官而現年錢糧未完足者亦准扣抵諭旨到日各該撫立行所屬張示徧諭有不肖有司以完作欠朦混銷算及開除

諭  
不清者該督撫即時題叅嚴加治罪爾部即遵諭行特

康熙四十六年十月初七日

諭戶部江南地方頻年雨暘時若百穀順成閭井黎氓咸  
得遂生樂業但民間夙鮮蓋藏禦荒無術一遇歲歉即  
有匱乏之憂朕屢次南巡素所洞悉今年自夏入秋雨  
澤愆期該督撫先後奏至因念小民久未被災驟罹荒  
旱所關甚鉅隨命九卿等速同詳議應行事宜業經勅



令停徵并發倉穀賑濟顧倉儲數少未足徧給惟各州縣截留漕米可以實惠及民目下時已屆冬總漕桑格無事著會同總督邵穆布巡撫于準親歷各州縣被災地方備加察勘將今年所徵漕糧每州縣或留八九萬石或留十萬石酌量足支賑給之數分別多寡存留支散及今漕米尚未開兌截現收之糧以濟待哺之衆實於民生大有裨益此朕殷殷懷保赤子軫念如傷之至意爾部即移文該督撫等實心奉行仍開具賑濟實數

奏聞特諭

康熙四十六年十一月初二日

諭戶部江浙地方賦役殷繁倍於他省朕屢經巡歷時切軫懷比年以來業已節次敷恩頻行蠲貸頃因兩省偶被旱災隨命按數減徵豁免漕欠並分截本年漕糧令該督撫親往散賑猶念民間素鮮儲蓄生計不充非更加格外滋培則荒歉之餘未能驟臻康阜茲特再施膏澤用弘休養康熙四十七年江南浙江通省人丁共額

徵銀六十九萬七千七百餘兩著悉與蠲免其今年被災安徽巡撫屬七州縣三衛江寧巡撫屬二十五州縣三衛應徵地畝銀共二百九十七萬五千二百餘兩糧三十九萬二千餘石浙江二十州縣一所應徵地畝銀九十六萬一千五百餘兩糧九萬六千餘石四十七年亦俱著免徵所有舊欠帶徵銀米並暫停追取俟開徵時一併輸納務使小民一歲之內絕跡公庭安處隴畝俾得優游作息經理農桑庶幾閭閻氣象可以日加豐

豫諭旨到日該督撫體朕孳孳惠愛黎元至意各飭有司實心奉行仍張示通曉令咸知悉儻蠲除不實致有侵冒察出定治重罪爾部即遵諭行特諭

康熙四十六年十一月二十三日

諭江浙在京官員大學士張玉書尚書王鴻緒等朕在宮中無刻不以民間疾苦為念恐遇旱澇必思豫防至巡幸各省於風俗民情無不諮訪即物性土宜皆親加詳考每至一方必取一方之土以驗試其燥濕今歲南巡

江浙見天氣久晴所經河渠港蕩之水比舊較淺即慮夏間或有亢暘之患是時麥田雖甚豐稔然南方二麥用為麩蘖者多不似北方專資麩食南方惟賴稻米北方則兼種黍稷粱粟有攜北方黍稷及蔬菜之類至南方種植者多不收穫此水土異宜不可強也且江浙地勢卑下不雨則蒸濕人不能堪有雨則涼人皆爽豁雖地稱水鄉而水溢易洩滂歲之為患尚淺旱歲則為患甚劇北方經月不雨亦尚無礙南方夏秋間經旬缺雨

則田皆坼裂禾苗漸槁矣喜雨亭記云十日不雨則無  
禾蓋謂此也江浙農功全資灌溉今河渠港蕩比舊俱  
淺者皆由素無瀦蓄所致雨澤偶愆濱河低田猶可厚  
水濟用高仰之田力無所施往往三農坐困朕茲為民  
生再三籌畫經久之計無如興水利建牖座蓄水灌田  
之為善也江南省之蘇松常鎮及浙江省之杭嘉湖諸  
郡所屬州縣或近太湖或通潮汐所有河渠水口宜酌  
建牖座平時閉牖蓄水遇旱則啓牖放水其支河港蕩

淤淺者並宜疏濬引水四達仍酌量建牖多蓄一二尺水即可灌高一二尺之田多蓄四五尺水即可灌高四五尺之田準此行之可俾高下田畝永遠無旱澇矣爾等其以朕意曉諭諸臣詳議以聞

康熙四十六年十一月二十九日

諭工部朕宵旰勤民視如赤子無一時一事不思為閭閻圖經久之計江南浙江生齒殷繁地不加增而仰食者日衆其風土陰晴燥濕及種植所宜迥與西北有異朕

屢經巡省察之甚悉大抵民恃田畝為生田資灌溉為急雖東南名稱水鄉而水溢易泄旱熯難支夏秋之間經旬不雨則土坼而苗傷矣濱河低田猶可厚水濟用高仰之地力無所施往往三農坐困朕茲為民生再三籌畫非修治水利建立牖座使蓄水以灌輸田疇無以為農事緩急之備江南省蘇州松江常州鎮江浙江省杭州嘉興湖州各府屬州縣或近太湖或通潮汐宜於所有河渠水口度地建牖隨時啟閉水有餘則宣洩之



水不足則儲蓄以備用其有支河港蕩淤淺者宜並加疏濬使引水四達仍行建牖多蓄一二尺之水即田高一二尺者資以灌溉矣多蓄四五尺之水即田高四五尺者資以灌溉矣行之永久可俾高下田畝無憂旱潦此於運道無涉而於民生實大有裨益今漕運總督與江浙督撫方料理截漕散賑爾部速移文該督撫等令將各州縣河渠應建牖蓄水之處並應建若干座通行確察明晰具奏爾部即遵諭行特諭

康熙四十七年五月初八日

諭工部朕南巡閱河時見洪澤湖風浪危險隄岸陡立商民船隻觸石損壞傷人甚多朕心時切軫念因特令河臣沿湖隄創設救生木椿自設椿以來數年內竝未損船傷人於商民大有裨益此椿應時加增修愈多愈善嗣後著江寧蘇州杭州三處織造每歲於節省銀內各捐五百兩解送總河衙門以備救生椿之用該督逐歲修理存案不必入奏銷如不實行修理於別項支用者

從重治罪

康熙四十七年十月十六日

諭戶部朕屢次南巡見閭閻殷阜之象遠不逮於舊時故於民生風俗無不一一諮訪雖不時蠲免額賦停徵積逋僅可支吾卒歲絕無餘蓄且今承平既久生齒日蕃食漸不充用多不給亦理勢之所必致朕每念及此未嘗不為惻然去年江南浙江二省俱被旱荒多方軫恤始蘇民困迨今歲復報潦傷旋經照例蠲賑竝下詔書

留漕資濟但歲再不登生計益匱欲令辦賦力必難供  
朕於國家一切經費累年搏節帑藏充裕以此渙敷膏  
澤藏富於民俾得盡力農桑衣食滋殖百姓既足國用  
何憂康熙四十八年除漕糧外江南通省地丁銀四百  
七十五萬四百兩有奇浙江通省地丁銀二百五十七  
萬七千兩有奇著全行蠲免所有舊欠帶徵銀米仍暫  
停追取此朕因江浙二省為東南重地特於格外施仁  
用宏休養之至意該督撫各飭有司張示遍諭務令窮

鄉部屋咸共知悉儻或別借事端侵冒徵派事發定從重治罪爾部即遵諭行特諭

康熙四十八年十月二十五日

諭戶部今歲入夏以後朕因南方二麥不登北地亦被微潦宵旰軫慮甚切焦勞繼而畿輔稔收三吳秋熟兼以四方奏報咸獲有年朕心始為稍慰夫水旱災傷事所時有而小民皆如赤子一以疾苦見告即不忍恣置於懷今念江南淮安府揚州府徐州三屬地卑積水被災

獨重秋禾未播種者甚多雖本年錢糧業經全免又曾遣官分賑而失業之民宜加格外之恩以宏愛養康熙四十九年淮揚徐三屬邳州等十九州縣三衛額徵地丁銀五十九萬三千八百兩有奇著通行蠲免又河南省歸德府屬商邱等六縣山東省兗州府屬濟寧等四州縣或被夏災或被秋災雖已各依分數例免額賦並宜更施膏澤用厚民生康熙四十九年商邱等縣應徵地丁銀二十萬二千四百兩有奇濟寧等州縣應徵地

丁銀一十四萬六千六百兩有奇俱著通行蠲免其應蠲免州縣有舊欠未完錢糧亦著停徵一年諭旨到日各該督撫嚴飭有司體朕殷殷軫恤災氓至意張示徧諭悉心奉行務俾窮鄉僻壤均霑實惠如有不肖官吏借端私徵者即行察叅爾部即遵諭行特諭

康熙五十一年

上諭戶部朕宵旰孜孜勤求民瘼永為惠下實政無如除賦蠲租除每歲直省報聞偶有水旱災傷照輕重分數

豁免正供仍加賑卹外將天下地丁錢糧自五十年為始三年之內全免一週使率土黎庶普被恩膏除將直隸奉天浙江福建廣東廣西四川雲南貴州及山西河南陝西甘肅湖北湖南各直省康熙五十年五十一年地丁錢糧一概蠲免歷年舊欠錢糧一併免徵外所有江寧安徽山東江西各撫屬除漕項外五十二年應徵地畝銀共八百八十二萬九千六百四十四兩有奇人丁銀共一百三萬五千三百二十五兩有奇俱著察明



全免其歷年舊欠銀二百四十八萬三千八百二十八兩有奇亦並著免徵計三年之內總免過天下地畝人丁新徵舊欠共銀三千二百六萬四千六百九十七兩有奇各該督撫務須實心奉行體朕軫念民生至意如有侵欺隱匿使惠不及民借端科派者督撫嚴行察叅督撫失察事發之日亦嚴加究治諭旨到日立即徧示城郭鄉村咸使知悉爾部即遵諭行特諭

康熙五十一年

上諭朕自沖齡即好讀書亦好寫字一切經史靡不徧閱成誦在昔賢哲所著之書間或字句與中正之理稍有未符或稍有瑕疵者後儒即加指摘以為理宜更正惟宋之朱子註明經史闡發載籍之理凡所撰釋之文字皆明確有據而得中正之理今五百餘年其一句一字莫有論其可更正者觀此則孔孟之後朱子可謂有益於斯文厥功偉矣朕既深知之而不言其誰言之於朱子宜何如表章崇奉爾等與九卿會同具議以聞

康熙五十二年

上諭海宇承平日久戶口日繁地畝並未加廣宜施寬大之恩共享恬熙之樂嗣後直隸各省地方官遇編審之期察出增益人丁止將實數另造清冊奏聞其徵收錢糧但據康熙五十年丁冊定為常額續生人丁永不加賦仍不許有司於造冊之時藉端需索用副朕休養生息之意

康熙五十六年

上諭戶部朕撫馭寰宇五十餘年夜寐夙興為小民勤求生遂凡率土遠近皆期共享樂利聿成家給人足之休未嘗一日不厯諸懷也數十年以來各省正賦屢經全免歷年積欠亦已蠲徵偶有雨澤愆期或發倉廩散給或截漕糧賑救不惜數萬萬金錢米穀頻沛恩施誠念窮簷之艱慮其至於顛連失所耳近者民力雖已稍紓然念分年帶徵銀兩若不格外優寬則小民一歲所獲分納二年之賦以其贏餘養贍室家斷難充足朕每懷及

此軫惻良深宜更加殊恩通行豁免今將直隸安徽江蘇浙江江西湖廣西安甘肅等八處帶徵地丁屯衛銀二百三十九萬八千三百八十兩有奇概免徵收其漕項雖例不准免亦著破格施恩將安徽江蘇所屬帶徵漕項銀四十九萬五千一百九十餘兩米麥豆一十四萬六千六百一十餘石內蠲免各半爾部即行文該督撫嚴飭所屬實心奉行徧加曉諭俾民間無徵催之累均沾實惠用稱朕撫卹羣黎至意儻有不肖有司借端

朦混私行徵收者該督撫嚴察叅處如該督撫失察一併從重處分爾部即遵諭行特諭

江南通志卷首二之一

欽定四庫全書

江南通志卷首二之二

聖祖仁皇帝御製

南巡筆記

康熙甲子春日有以時值上元請行封禪及巡狩燔柴  
諸典禮者夫朕涼德菲躬臨御海宇邇年以來水旱兵  
戈民亦勞止雖邀天庇佑四海蕩平萬姓樂業實未有  
豐功偉烈足以昭示來茲何敢效法前人銘功紀德至



於巡狩古天子所以周省侯國使諸侯肆覲明堂考其政績今天下之權統一於內督撫之賢不肖朕皆得而知之又無事於巡狩之名也惟是近畿郡邑屢經巡幸補助時施而東南黎民風俗尚未周知乃於秋九月陳請

兩宮暫違定省二十八日出京師經河間過德州閱濟南城觀趵突泉題曰激湍百姓遮拜馬首口戶繁盛比屋可封昔稱臨淄之間肩相摩轂相擊者今尚有遺風焉

十一日至泰山石徑峻嶒緩步登陟四十里御障崖瀑  
水懸流五大夫枯松猶在巖畔或亦後人繼植者入南  
天門捫秦時無字碑至孔子小天下處真可收羅宇宙  
暢豁襟懷題普照乾坤雲峰諸字宿泰山巔月色清朗  
賦詩遣興來日登日觀峰看扶桑日出下山祀於嶽廟  
嶽為五方之長發生萬物故躬祀之為蒼生祈福十三  
日雨雪駐蒙陰縣侍臣云明日小雪喜其應候詰朝雪  
霽望蒙山峰頂半入雲霧或隱或見其上石衣土人攀

緹取之名蒙山頂上茶嘗考四川雅州有蒙山五峰極高峻上產甘露茶世所傳者或雅州之蒙山也渡沂水取魚既多且鮮因遣使馳進

兩宮以志思戀之懷蒞花鋪青淮之界居人輻輳十八日發宿遷縣閱黃河北堤岸一百八十里頻年水患工役浩繁民俗罷敝不若山左之庶饒渡河舟行過清江浦淮安府商賈往來舟楫如織寶應縣高郵州邵伯鎮皆以湖水汎濫未復故道居人草屋臨流牀竈半在水中朕

甚憫焉登岸步行十餘里親察水勢召集耆老秀才細  
訪其故皆云自海口壅塞水無所歸二十年來田畝已  
成巨浸賦詩紀事思所以拯濟之廿三日抵維揚市肆  
繁華園亭相望遊平山堂天寧寺百姓持香夾道意甚  
誠敬平山堂乃宋臣歐陽修所建修以文學侍從之臣  
出知揚州為政之暇優游談讌傳為佳話故朕詩有文  
章太守心偏憶之句廿四日將由儀真幸江寧府忽遇  
順風可以速達京口遂乘沙船順流而下波恬浪靜瞬

息七十里沙船江中戰艦也自岳州長沙用兵以來多得其力今河海清晏當時戰具僅供渡江之用然安不忘危朕於此時未嘗不念艱難用武之際次早登金山孤巒隱岫屹峙大江中飛閣流丹金碧照灼更有一峰離立曰善才石郭璞墓在其西上有妙高臺留雲亭朝陽洞下有中泠水稱天下第一泉朕燕扈從諸臣一一探眺縱目千里題江天一覽四字并賦二詩竹林禪院在鎮江府城南五里曲徑逶迤茂林修竹高者四五丈

大者圍尺青葉碧枝陰森崖谷實北地之所未有晚而  
登舟揚帆丹陽縣常州府無錫縣俱未及泊一晝夜行  
三百六十餘里達姑蘇舟人云從無如此之速者廿七  
日由楓橋入閶門登城閱視士民觀瞻莫不抃舞有獻  
賦頌者是日駐蹕城中念職事人役辛勤遠來遍賞白  
金聽其各帶方物以示體恤廿八日回鑾過虎邱山不  
甚高亭榭欄檻布滿其上千人石高下可容千人傳為  
生公講經處故旁有點頭石劒池在夾崖中殊可觀平

遠堂俯瞰虎邱之背田疇林木望若錯錦蘇民仍列酒  
坊茶肆各安生業管絃競奏覺有昇平景象然徒事紛  
奢罔知務本未若東北風俗之樸實耳夜坐舟中與侍  
臣高士竒探論古今興廢之跡或讀尚書左傳及先秦  
兩漢文數篇或談周易或賦一詩每至漏下三十刻不  
倦日以為常蓋詩書意味深長不似耳目之好易於煩  
厭也舟過無錫縣遊錫山觀惠泉石甃八角池水色滄  
泓味較玉泉遠不相及不知前人何以稱之為第二泉

二十九日由丹陽縣陸行初一日過句容縣蜿蜒石堤  
數十里抵江寧府雨花臺在城南登之則江山城郭歷  
歷可見報恩寺規制宏壯寶塔九級金碧琉璃盡鏤梵  
相結構之巧殆竭人工非前代內帑所修不能至此城  
中闌闌充實烟火萬家景物太平昔稱六朝佳麗今亦  
不減大都也明日祭明洪武陵見其頽廢勅地方官禁  
護之過明故宮僅存遺址不禁慨然作過金陵論并賦  
一詩登觀星臺望後湖題曠觀二字又明日再遣使進



兩宮方物閱鎮將射於教場頒賜扈從諸臣幣帛督撫御  
衣初四日發江寧府泊燕子磯峭壁臨江亦有勝致初  
十日閱高家堰堤工望洪澤湖汪洋千頃復由河南岸  
行一百八十里過桃源縣十一日渡河至宿遷次日駐  
蹕蒞花鋪自郟城沂州取道東兗渡沂濟禘汶泗諸水  
泗水出陪尾山下泉林寺側石穴吐水衆泉俱導古樹  
成林有石碑刻子在川上處然闕里志載孔子觀川亭  
在尼山宣聖廟側未知孰是十六日長至節天氣晴暖

無朔風祁寒扈從諸人莫不欣喜十七日過少昊陵顏  
子林駐蹕曲阜縣南十八日黎明祀於闕里齋心穆穆  
若有所見禮畢坐詩禮堂命孔氏子孫講周易大學遍  
觀車服禮器及漢唐碑版檜樹在大成門內古幹蒼然  
苔蘚潤澤真靈蹟也敬想至聖道冠百王前代留金銀  
器具皆人力可辦獨以仗前曲柄龍蓋留廟中并書萬  
世師表四字過闕里詩古檜賦出北門醴酒孔子墓下  
伯魚墓在孔子墓東十餘步子思墓在其前西有子貢

廬墓之所左有宋真宗駐蹕亭林中竒樹葱鬱未可計  
數行三十里駐蹕兗州府杜甫所謂浮雲連海岱平野  
入青徐是也念周公制禮作樂道接文武頃過曲阜未  
得躬謁廟庭特製祭文遣親藩代祀之遂由汶上東阿  
高唐至德州亟欲定省

兩宮兼程而歸是行也往返數旬所歷山東江南諸郡縣  
日以周諮民隱體察吏治為首務行道之頃復得覽其  
山川憑弔古蹟至於地方利弊則將有以斟酌損益焉

率筆記之示朕之不徒事遊豫也

恭侍

皇太后駕臨金山記

朕臨馭以來緬維

祖宗付託之重孜孜圖治宵旰不遑茲幸中外清平無事  
則裕民肅吏以登上理端在斯時顧朕身居九重慮周  
部屋閭閻疾苦容或墜於上聞又淮黃濬築務繁非親  
行相度亦無由底績於是載舉南巡之典以諮求民瘼

然上念

皇太后春秋亦高矣誠恐違離日久定省有缺於心歉然用是敦請同行謹擇於今年二月之吉朕率諸子捧

鑾輿登仙鷁發自潞河一路問安視膳無間

宮闈朕心少慊惟

皇太后天性仁慈軫念民隱尤切每見田家作苦則指謂諸子曰稼穡艱難如此汝輩生長深宮可勿念乎諸子悉受教惟謹即朕日祇聆

懿訓所至布德施惠惟恐一夫不獲

聖慈每聞之必為色喜顧謂諸子曰汝父皇愛民如是太平可永保矣老身為加一飯蓋盛德之下逮如此河工既閱畢朕將南由吳會歷武林取道建業以歸乃復奉慈駕南臨於四月之望自瓜步渡江江中有峰聳峙曰金山亦名勝也山椒庭院清幽齋堂闕邃爰掖

慈幃於斯駐蹕焉而是日天氣晴和江光如鏡帆檣上下烟樹氤氳

皇太后隨意矚眺

天懷舒暢朕率諸子進蔬茗獻筍芋即山櫻沼芡並荷

親嘗曰田間味何可棄也蓋

皇太后秉躬謙抑雖瞿曇蘭若亦施恩禮又

聖澤所加首先兪獨諸凡村嫗田婦罔不攜持童穉環繞  
翟車仰瞻宮扇一時

懿綸溫慰賞賚駢蕃而臣僚命婦之嫻於禮者亦皆環珮  
霞帔伏迎道左親炙

鑿輿遠近傳為盛事山陬海筮婦孺旄倪稱兕觥而祝  
慈壽者且數千里趾相接也猗與休哉朕觀從古陰教如  
省繅觀獲載在禮經即前代宣宗亦嘗親奉母幃巡覽  
畿甸賦詩紀事侈為美談朕茲幸際昇平太和豫順合  
億兆之歡心以隆尊養亦庶幾以孝治光海宇之意而  
皇太后之徽音懿行可臚彤管為萬世母儀法者尤亘古  
罕觀也朕謹熏沐拜紀勒諸貞珉以垂奕禩云

金山江天寺碑



大江之中有山岌岌業業湧波濤而傑出者無如金山  
山之上高閣飛棟軒然四列凡夫日月之蔽虧風烟之  
噴薄帆檣樓堞鳧魚之出沒隱見於其中者舉可俯而  
有也夫岷山之源其始濫觴及乎建瓴而下近縈巴蜀  
遠跨荆揚數千里而歸墟於大壑滔滔南紀昔人目之  
天塹當六代時偏安建業江之左右遂為重鎮是山以  
卷石屹乎中流引淮泗苞吳會可不謂天下之雄觀形  
勢之極勝者哉今四海一家書同軌合纖塵不揚斥堠

無警舟車則萬國霧會筐篚則九域星馳是山也信足  
以為登臨之美蓋異夫昔之憑藉江山以為險者矣朕  
南巡過此停憇山寺撫長江之安流見水天之相接曠  
焉興懷書江天一覽四字畱之寺中爰命葺而新之不  
以勞吾民事竣請額其瑰壯巨麗當益足以增江山之  
竒矣因憶舊觀浩淼澄泓空濶無際猶可心會遂名之  
曰江天寺云

過金陵論

金陵禹貢揚州之域秦立郡縣為秣陵兩漢因之孫權時稱建業東晉及宋齊梁陳地號佳麗隋唐之間六朝舊跡漸致湮沒南唐李氏始更築城名金陵府明有天下建都於此窺明太祖之意以為宅中圖大控制四方千百世無有替也歲在甲子冬十一月朕省方南來駐蹕江寧將登鍾山酌酒於明太祖之陵道出故宮荆榛滿目昔者鳳闕之巍峩今則頽垣斷壁矣昔者玉河之灣環今則荒溝廢岸矣路旁老民跽而進曰若為建極

殿若為乾清宮階礪陛級猶得想見其華構焉夫明太祖以布衣起淮泗之間經營大業應天順人奄有區夏頃過其城市閭閻巷陌未改舊觀而宮闕無一存者觀此興懷能不有吳宮花草晉代衣冠之歎耶昔人論形勢之地首推燕秦金陵次之然金陵雖有長江之險為天塹而地脈單弱無所憑倚六朝偏安弗克自振固歷數之不齊或亦地勢使然也明自文皇靖難之後嘗以燕京為行在宣德末年遂徙而都之其時金陵臺殿苑

囿之觀聲名文物之盛南北並峙遠勝六朝迨承平既久忽於治安萬厯以後政事漸弛宦寺朋黨交相構陷門戶日分而士氣澆漓賦斂日繁而民心渙散闖賊以烏合之衆唾手燕京宗社不守馬阮以囂偽之徒託名恢復僅快私仇使有明艱難創造之基業未三百年而為丘墟良可悲夫孟子曰天時不如地利地利不如人和有國家者知天心之可畏地利之不足恃兢兢業業取前代廢興之蹟日加儆惕焉則庶幾矣

南巡詩一

晚經淮陰

淮水籠烟夜色橫  
棲鴉不定樹頭鳴  
紅燈十里帆檣滿  
風送前舟奏樂聲

平山堂

宛轉平岡路向西  
山堂遺構白雲低  
簾前冬暖花仍發  
簷外風高鳥亂啼  
仙仗何嘗驚野夢  
鳴鑣偶爾過幽棲  
文章太守心偏憶

歐陽修自題平山堂  
詞有文章太守之句

墨灑龍香壁上

題

天寧寺

小艇沿流畫槩輕  
鹿園鐘磬有餘清  
門前一帶邗溝水  
脈脈常含萬古情

由儀真乘巨艦至京口

長江萬里開鴻濛  
高檣巨楫乘艤艫  
儀真京口路百里  
挂帆瞬息凌長風  
汀蘆洲樹看歷歷  
波恬浪闊光融融  
湍流直下入滄海  
遠源上與岷峩通  
山川斷續合雲霧

日月照耀浮虛空舟行迅速疾飛駛恍聞擊鼓馮夷宮  
施樓高據極觀眺竒縱豁達舒心胸年來江漢罷桴鼓  
河海清宴絕戰攻舳艫閒擊沙岸側水師捲甲懸長弓  
羽葆南巡渡揚子居安更念艱難功

金山

并序

金山在大江中南眺潤州北臨瓜步登陟其上縱目千  
里泱泱乎大觀也朕率扈從諸臣歷覽諸勝江山之竒  
未有逾於此者



一覽江天勝東南勢盡收帆檣來極浦臺榭起中流  
出丹崖上煙同碧漢浮登臨豁心目浩蕩俯滄洲

試中冷泉

緩酌中冷水曾傳第一泉如能作霖雨露灑遍山川  
妙高臺

臺高絕衆鳥臨眺暢清襟渺渺沙洲樹青青遠岸岑  
波濤巖下接洞壑搯邊深江水明如鏡彌徵天地心

鐵甕城

萬里晴江擁舳艫城高鐵甕接康衢遺銘欲探華陽蹟  
舊宅難尋海岳圖半面煙嵐雄北固一方形勢控東吳  
龍舟漫道巡行盛多恐深居政未敷

竹林禪院在潤州城南竹徑數里

一徑入深竹數里來上方叢生巖磴密枝拂雲煙長華  
旗出林際芝蓋停三陽颯颯吹霜風珀碧葉紛翱翔山齋  
頗幽寂萬籟含虛光觸物感予懷歌彼淇澳章

夜過丹陽

錦纜徐牽夜未停  
遙天煙靄淡疎星  
居人兩岸明燈火  
早是輕帆過驛亭

錫山

朝遊惠山寺閒飲  
惠山泉漱石流仍潔  
分池溜自圓松  
間幽徑關巖下小  
亭懸聊共羣工濯  
天真本浩然

吳閶

鳴鑿獨上高城望  
巷陌遙通水寺斜  
土俗惟知鬪歌舞  
閶閶不解種桑麻  
烏啼茂苑千年樹  
霜冷吳宮十月花

聲教四方猶未訖願將淳樸變繁華

虎丘

小阜迴岡落照紅長廊曲榭構西東獨憐劍石潺湲水  
霸業銷沉在此中

句容道上

漸入茅山境來當農暇時但看初日上未覺朔風吹碧  
斂寒塘水紅垂野樹枝江南經幾郡民俗欲周知

雨花臺

何地飛花雨  
晴空無片雲  
江山恣遐矚  
草樹出清芬  
城郭參差見  
樓臺遠近分  
人家百萬戶  
煙火盡氤氳

幸報恩寺

鳳刹高懸上界燈  
珠缸壁帶一層層  
平臨下見諸天小  
晴日江山萬里澄

駐蹕金陵以方物寄獻

兩宮

深宮違定省  
經月戀晨昏  
率土方為養  
蒼生共戴尊  
題

書千里重託物寸心存遣使旌門外踟躕望九閭

金陵舊紫禁城懷古

秣陵舊是圖王地此日鸞旗列隊過一代規模成往蹟  
六朝興廢逐流波宮牆斷缺迷青瑣野水灣環剩玉河  
治理艱勤重殷鑒斜陽衰草繫情多

示江南大小諸吏

東南財賦地江左人文藪時巡歷此疆民事日探剖風  
俗貴淳厲紛奢詎能久澄清屬大吏表率羣僚首郡縣

布慈和愷悌歌父母民者國之本生計在畎畝六府既  
孔修三事安可後教民默轉移各須盡官守戶使敦詩  
書人知崇孝友庶幾遠邇氓皞皞登仁壽誥誠申予懷  
斯言慎不負

燕子磯夜泊

魏我一片江頭石千載人傳燕子磯疑有鼉鼉藏窟宅  
時聞鐘磬出山扉牙檣緩住寒煙淨羽衛周連夜火圍  
沙岸聲聲動行漏蘆花深處雁驚飛

高郵湖見居民田廬多在水中因詢其故惻然念之  
淮揚罹水災流波常浩浩龍艦偶經過一望類洲島田  
畝盡沉淪舍廬半傾倒斃斃赤子民棲棲卧深潦對之  
心惕然無策施襁褓夾岸羅黔黎跽陳進耆老諮諏不  
厭頻利弊細探討饑寒或有由良慚奉蒼顛古人念一  
夫何況覩枯槁凜凜夜不寐憂勤怒如擣亟圖濬治功  
拯濟須及早會當復故業咸令樂懷保

南巡詩序



朕念切民依咨詢幽隱於二十八年春再舉南巡爰自  
畿甸東臨齊魯沿沂江淮達於吳越曩者甲子之歲輿  
衛所經瞻顧閭閻觀省謠俗憫懷澤國軫恤羣黎未嘗  
一日忘於朕心已嘗形諸篇詠載前集中今茲重歷郡  
邑見民物漸殷生業就理遠勝曩時中心慰悅又不禁  
吟咏及之途中停警撤蹕欲以洞悉輿情數千里間百  
姓歡躍載路星攢雲集瞻依愛戴發於至誠朕自惟化  
理何以克洽民情益用是欽然也乃於巡歷所至沛膏

澤飭官方戒民俗修典禮經武備覽河防施諸事矣又  
發諸言或御帳殿或撫船牕吟咏所及性情在焉古人  
云詩言志凡朕篇章所寓時以民生風化惓惓為念即  
間於眺覽之際抒寫景物指顧山河要其寄託則自有  
在也因裒而集之為南巡詩一卷云

南巡詩二

再過淮南

并序

嚮者巡省江左道出淮南軫念窮簷憫懷澤國今見居

民景象較前稍豐良慰朕懷

前來歷茲境斯民似未遂今日再經過風土覺有異紈  
褐既充體廬舍各完置擁道歡趨迎扶老與攜穉咸云  
獲休息近免徭役累水患日就平田疇可耕植一飲與  
一食莫不歌帝賜素念切民依時為勞寤寐大造本無  
私湛恩欲廣被聞言聊自寬庶慰省方意

淮城曉霜聞雁

天際晨光水月連帶霜歸雁向前川  
五城曉發寒仍在

談笑春風雜紫烟

蠲江南逋賦并序

江南屢年逋賦二百二十餘萬逐歲帶征聞吏民頗以  
為累朕志存約已宏澣衣菲食之風事期裕民師挹彼  
注茲之義特頒詔令悉與蠲除

國家財賦東南重已責蠲租志念殷膏澤何妨頻見渥  
普天願與樂耕耘

過維揚并序

南巡以來減撤儀衛所歷都邑垂髻戴白聽其趨蹌馬  
首有以管籥迎者輒禁止之頃過維揚商民比屋連艘  
充盈可喜但結綵張燈闐溢巷陌雖邗溝為東南孔道  
歡迎亦兆庶至情猶恐前途相效勅地方長吏諭以省  
費惜財并賦此詩

重過邗溝地春風細草生帆檣連賈舶笙吹滿江城物  
力須教惜民情亦見誠繁華當淑景氣象喜充盈

金山江天寺

獨愛江天寺停橈上碧峰波瀾聲浩浩樓閣勢重重日  
暖浮雙樹風微送午鐘遙看南北岸春色澹春容

焦山

焦山何岸峒遙與金山峙草木盡蒙茸幽偏隔城市放  
舟下中流攀蘿上涯溪隱士不可招鶴銘洵足紀棲鶻  
驚人飛暮雲千萬里

駐蹕金山

烟霧空濛水國昏夜移鳳舸泊山門然犀欲照元龜窟

臥聽濤聲自吐吞

雨過錫山

輕雲冉冉霧彎環  
細雨絲絲幕遠山  
畫舫青簾開曉坐  
平波漫衍白鷗閒

虎邱望山後

試劍空存石生公  
尚有臺愛看山後  
景錯落野田開

鄧尉山

鄧尉知名久  
看梅及早春  
豈因耽勝賞  
本是重時巡  
野

靄朝來散山容雨後新  
繽紛開萬樹相對愜佳辰

鄧尉小軒望太湖

山軒閒坐倚前楹  
萬頃澄湖夕照明  
夜久天心初月上  
笙簧謾謾奏松聲

登靈巖

霏微靈雨散春烟  
按轡逍遙陟翠巔  
香水通流明若箭  
琴臺列石勢如拳  
諸峰盡在青蘿外  
萬井全依綵仗前  
聞是吳宮花草地  
空餘鐘磬梵王筵



晚過吳江

垂虹蜿蜒跨長波  
畫戟牙樯薄暮過  
燈火千家明似晝  
好風好雨祝時和

入平望

并序

平望為浙江界長吏以畫舫五百來迎恐勞民力卻之不御

錦纜無勞列綵艘  
輕撓自愛倚船牕  
勤民不憚周行遠  
早又觀風向浙江

將遊華山以欲雨未往

欲向青山澗壑行春雲又變曉陰輕  
勾陳不遣驚禪定  
恐礙林間碧草生

雨中幸錫山園林

澹冶青山色幽探傍曉來烟籠巖下竹  
雨洗石邊苔斷  
續聽啼鳥飄搖惜落梅胸襟原浩蕩  
隨意坐亭臺

惠泉

寒雲覆樹昔年經

甲子觀惠泉在十月

再品山泉到此亭春水一

犂農事足喜看膏雨徧郊坰

無錫小民以羔羊惠酒爭獻御舟笑而遣之

自昔君門隔九閤如何草野得攀援多因愛此元元切  
忘分公然學負暄

句容雨望

山行逐高低四望多松樹雨裏萬人家遙看隔雲霧

巡幸江寧

南省封疆惟此區江流環繞壯規模華旗芝蓋重臨幸

二水三山半畫圖  
吏事莫先田野治  
民情但願閭閻孚  
不知比歲恩波洽  
止聽黃童白叟呼

賜江寧文武將士宴於教場

瑞雲捧日曉初晴  
麗景天開羽仗明  
扈蹕趨桓多絳灌  
分行俊譽盡璵璠  
三漿滿浥沾須徧  
五載南巡澤再傾

自甲子南巡  
今已五載

文穆武恬慙  
代理萬方無事宴昇平

再過明故宮

樓臺金粉已沉銷  
不獨詩人說六朝  
月落宮垣春寂寂

經過惟歎草蕭蕭

江寧駐蹕并序

江寧士民羣詣行在爭獻米穀兼羅果蔬涕泣請留屢  
諭不止俯徇億兆之願勉遲信宿之行

心勤民隱獨諮諏不為江山作勝遊白下回鑿期已近  
黔黎擁道欲何求多憐野老堆盤獻勉就輿情兩日留  
二十八年宵旰意豈圖遠邇慕懷柔

後湖

森森長湖水春來發綠波飛鳴下鳧雁朝暮集漁蓑

登報恩寺浮圖

湧地千尋起摩霄九級懸琉璃垂法相翡翠結香烟締  
造人功巧流傳世代遷曠然彌遠望萬象拱諸天

上巳日再登金山

晴和逢上巳况在大江濱正是回鑿日揮毫記此辰

長江夜月

萬頃淪連映平沙一望收天光起水色雲影共波流隔

岸姑蘇遠臨軒夜月浮民情咸自得何必泛龍舟

曉發維揚順風揚帆午餘已過秦郵

傍曉發蕪城風帆疾如駛晚照半平湖舟行百餘里

自宿遷解纜一日夜達山東境

千里南程幾日回輕舟直下沂潞洄天風更假帆檣便  
一夕山東境上來

南巡詩序

朕三度南巡咸因視河親為籌畫遂至江浙察吏安民

所歷之地隨其時宜廣沛膏澤拯疾苦焉茲行兼奉  
皇太后鑾輿而南既可無闕定省之儀且欲見

先帝開基富有四海而朕守成教育率土清寧無慚付託  
以博

慈顏之懌悅然往返遄迅絕無滯留百司章奏三日一送  
行在即與剖決舟行多暇仍覽書史日操觚翰偶寄吟  
篇莫非記採風俗時存懷保競業之意後之人讀朕前  
後南巡諸詩知朕心之有在云爾



南巡詩三

入江南

行盡竟東程乍入江南路水潦切痾瘵深心察其故  
經邳徐界上

泗水通淮澤坡陀認馬陵經過懷十載戶口幾新增  
雨

雲氣未肯開綿密清明雨繫纜古河湄為念夫徒苦

閱河

淮黃疏濬費經營跋涉三來不憚行幾處隄防親指畫  
佇期耕稼樂功成

渡揚子江

曉霧風初豁揚帆縱綵舟危峰真屹立漩水急回流碧  
轉沿江柳沙平遠嶼洲十年巡再至騁目睇神邱

金山寺月夜

江山春物已雍和萬里晴光月倍多重倚高樓觀海闊  
浩然心境更如何

巡歷江南示意

財賦稱茲地時巡復此經  
春膏宜豆麥烟景徧林亭  
靡麗風應換敦龐訓屢形  
施恩頻已責聊爾翠華停

虎丘

隨風畫檝到山塘  
水市陰籠草木香  
石不點頭誰說法  
惟存澗響雜笙簧

示江南浙江守土諸臣

宇宙方清寧  
吏治尚端廉  
農使樂耕鑿  
民使適里閭  
大

寮總其要小吏毋苛纖紀綱不可弛隨時酌寬嚴為上  
能自愛羣屬必畏鉗訟惟善得情操守時警矻勿恃才  
妄作勿以媚自快務令比戶豐膏澤遠近霑朱轡與彤  
騶萬姓所具瞻臧否道有碑防口難可箝不見廣厦材  
聳榦從幽潛不見沖霄鶴飲啄本靜恬告誡示勉勗保  
護茲庶黔

花山

警蹕來初地青山鳥道深風生松澗合雲暗石苔侵靜

畫飛閒蝶餘香噪晚禽空留支遁跡物外託宸襟

支硎山

龍池東北古支硎石室寒泉句可聽

支遁詩云石室可蔽身寒泉濯溫手

想得雨餘懸瀑布飛流界破數峰青

回鑿復過惠山

是誰妙筆點巒容蘊藉迎人四五峰堪挹山泉烹雀蕊  
併添新黛入甌濃

舟行野望

惠風萬頃下芳畦  
遠水拖烟曉狀迷  
河上草新纔覆地  
林間花墮半沾泥  
翩翩弱燕穿船入  
宛轉芳鶯隔樹啼  
若問撫闌端坐意  
默思豐裕洽羣黎

駐蹕江寧偶述

雲覆輕陰雨淨塵  
南巡又隔十經春  
山河舊數陪京重  
士庶今看沐化淳  
古巷烏衣人已換  
芳洲白鷺跡成陳  
元元億萬咸安樂  
教養休和屬大鈞

修報恩寺埵初畢登之

塢勢搖晨旭憑陵上九霄琉璃莊淨域金碧起香寮地  
俯三山近江環匹練遙隔窓雲霧起戶戶瑞烟飄

過明太祖陵有感

拔起英雄草昧間煌煌大業豈能刪玉魚金盃雖如故  
烟霧低迷獨愴顏

月夜登燕子磯

石勢疑飛動江濤足下看天空皎月風定斂奔湍綠  
樹燈光亂蒼厓夏夜寒經過覩形勝往往駐鳴鑿

江行

風帆來往亂江流  
樓艫縱橫拍浪浮  
只在艚工持柁穩  
曾將為政喻操舟

金山雨望

烟樹重重兩岸間  
流雲著水水漫漫  
江烟江樹無窮盡  
不讓蓬瀛島上山

山中晚霽

返照開澄景  
餘霞作綺流  
夜深明月出  
隔岸見蘆洲



中冷泉

靜飲中冷水清寒味日新頓令超象外爽豁有天真  
望焦山念己己曾登其上

大江日夜波汪洋金山焦山兩相望金山樓閣蕩丹碧  
焦山竹樹多鬱蒼境深流廣人罕至往年曾一登其岡  
頃者放舟仍北渡壯哉混漾雲低昂青巖翠壁幽且蒨  
圖經名著傳焦光何時瘞鶴在山足遺銘剝蝕存華陽  
山下有瘞鶴銘為華陽  
真逸撰止存六十餘字葭洲白鳥忽飛出江花冥冥江

草芳是日雨餘氣清淑夏首晴晝欣舒長倚艦四顧暢  
襟抱好風豁達來天閭

念淮揚居民特畱漕糧二十萬以濟之回鑿之日復諄  
諭所司使布實惠

廣厦豈不樂何事駕飛艦意惟悉民隱遑問歷道途淮  
揚皆巨郡地本號饒腴居人百萬家土狹濱衆湖禾麥  
苟不登老幼日待舖恩意宜渥沛拯濟畱天儲實惠布  
州邑遠邇均有無諄諭嚴再三毋徒飽吏胥茅屋有起

色比戶充黍稌願茲瘠壤農皞皞躋唐虞

泛洪澤湖偶詠

積水空明浸太虛輕舸閒泛進徐徐菰蘆絕岸柴門小  
終歲生涯業捕魚

渡河北歸

三吳問俗罷旋蹕渡洪流微日籠華蓋輕颺送御舟水  
能安汎濫堤遣護田疇自此民休息紆予南顧憂

宿遷

行過江南水與山  
柳舒花放鳥緡蠻  
明朝重至邳州路  
鳳闕龍樓計日還

賜總河靳輔

防河紆旰食  
六御出深宮  
緩轡求民隱  
臨流歎俗窮  
何年樂稼穡  
此日是疏通  
已著勤勞意  
安瀾早奏功

高旻寺碑記

茱萸灣者乃維揚俗稱寶塔灣也居三分河之中南眺  
金焦諸峰北枕蜀岡之麓足為淮南勝地凡上江由儀

真下江由瓜步至此皆會歸運河而北上也朕比歲以  
來躬臨河干諮詢經畫者屢矣每抵一處未嘗不懷保  
編氓施惠工商故兩淮鹽課永減額徵停輸贏羨又聞  
往來迎送費用私派者甚鉅特頒嚴旨盡為禁止從此  
商民得以安席漸皆獲所則朕之巡幸者少有益乎朕  
三十八年奉

皇太后鑾輿偕行晨昏侍養視河既畢勉從輿請濟江而  
南周覽吳會民生風俗見茱萸灣塔歲久寢圯朕欲頒

內帑略加修葺為

皇太后祝釐而衆商以被澤優渥不待期會踴躍赴功庀材協力唯恐或後不日告竣舊刹式廓鼎新莊嚴宏敞兼以翬飛傑閣憑高四眺臨大江通南北因書額賜之曰高旻寺勒文於石垂示久遠惟是雨暘應時河海清宴舉一世共臻於仁壽之域斯四十餘年宵旰勤民之念所厚期也即此塔工藏事具見羣情愛戴之誼出於至誠是亦有不可泯者爰為書之以志始末云康熙四

十三年秋九月重陽日書

操舟說

器之利用而致遠者陸行莫如車水行莫如舟舟之為用也逸於車而險或過之若享其逸而不入於險則恃乎操舟者之有其道也當夫水石擊撞波濤怒飛迴颿如鷺驟合若離此非其巧之為乎至於浮滄溟駕虞淵歷艤艗如衽席泛浩瀚以洄沿此非其習之然乎若或凌萬頃之中流驚颶風之四集檣檝傾徒侶失色巧

者不及施習者不及試斯時也惴惴然有胥溺之憂自  
非備之以至豫而持之以至慎殆鮮克濟事焉蓋其所  
為巧與習者藝也而其所為豫且慎者道也易曰濡有  
衣袽終日戒詩曰紼纒維之言其豫也言其慎也朕南  
巡江淮間見操舟者苟備之豫而持之慎矣雖大舟罔  
弗如其意之所欲為焉苟備之不豫而持之不慎舟雖  
小亦不能勝任而愉快也夫舟一器操舟一藝耳猶必  
有道持之以不至於敗况居天下之大器者哉揚子有



言乘國者其如乘航乎航安則民安矣此物此志也

河臣箴

自古水患惟河為大治之有方民乃無害禹疏而九平  
成攸賴降及漢唐決復未艾漸徙而南宋元滋溢今河  
昔河議不可一昔止河防今兼漕法既弭其患復資其  
力矧此一方耕鑿失職澤國波臣恫瘝已極肩茲鉅任  
曷容怠佚毋俾金隄潰於蟻穴毋使田廬淪為蛟窟毋  
徒糜國帑而勢難終日毋虛勞畚築而功鮮覈實務圖

先事盡利導策莫悔後時飾補苴術勿即私而背公勿  
辭勞而就逸惟潔清以自持兼集思而廣益則患無不  
除績可光冊示我河臣敬哉以勗

漕臣箴

國家定鼎會極幽冀歲漕東南積待惟備舳舻銜尾數  
百萬計轉輸有程貴以時至專設重臣式董厥事我徒  
我旅亦云孔勸尚其寬恤厚彼糗糧尚其撫綏摩彼疴  
痒毋借空名耗閭左藏毋踵陋習損經制常爾克持廉

則吏罔弗臧吏克守法則軍罔弗康軍既樂康競輓以  
將孰困而逋孰盜其糧官苟剝之用飽已囊下復效之  
鼠雀曷防濡滯河干如稻集蝗總計而論蝕我太倉國  
儲民食毋乃兩傷爾膺斯任莫忝王章

提鎮箴

武臣之職建威銷萌星羅綦布以壯干城韜鈴宜裕紀  
律宜明拊循宜至訓練宜精計安黎庶爰設五兵易言  
畜衆詩詠求寧閭閻叅伍勿擾吾氓山無伏莽海絕長

鯨民恬耕鑿惟爾之能饋餉時給毋致呼庚爾能廉潔  
衆以飽騰投醪飲河古史所稱惠逮卒伍忠愛乃生如  
捍頭目如衛父兄羣心從違視爾攸行文武輯睦毋相  
抗衡軍民調劑務持其平朕親簡閱黜陟有程下逮偏  
裨選授匪輕才勇必錄竊隋必懲矧爾大帥節鉞是膺  
宜體朕意勉竭股肱

江南通志卷首二之二

欽定四庫全書

史部

江南通志卷首三之二

詳校官給事中臣丁雲錦

檢討臣德生覆勘

總校官編修臣王燕緒

校對官中書臣汪學金

謄錄監注臣張裕田

欽定四庫全書

江南通志卷首三之一

世宗憲皇帝詔諭

康熙六十一年十一月

奉

天承運

皇帝詔曰惟我國家受

天綏祐

太祖

太宗肇造區夏

世祖章皇帝統一疆隅我

皇考大行皇帝臨御六十一年德茂功高文經武緯海宇

寧謐歷數悠長不謂謝棄臣民遽升

龍馭親授神器屬於藐躬朕

皇考大行皇帝

德妃之子昔皇二子弱齡建立深為



聖慈鍾愛寢處時依恩勤倍篤不幸中年神志昏憤病類

風狂

皇考念

宗社重任付託為艱不得已再行廢斥待至十有餘年沉疾如故痊可無期是以

皇考升遐之日

詔朕繼承大統朕之昆弟子姪甚多惟思一體相關敦睦罔替共享昇平之福永圖磐石之安孔子曰三年無改

於父之道我

皇考臨御以來良法美政萬世昭垂朕當永遵成憲不敢  
少有更張何止三年無改至於

皇考知人善任至明至當內外諸大臣朕方亟資翊贊以  
期終始保全務宜竭盡公忠恪守廉節俾朕得以加恩  
故舊克成孝思倘或不守官箴自干國紀既負

皇考簡拔委任之恩又負朕篤愛大臣之誼部院屬吏直  
省有司亦宜實心任事潔已奉公不得推諉上官自曠

厥職天下百姓受

皇考恩澤日久蠲賑頻施勸懲備至間有愚氓甘犯律令  
皇考每遇讞決必加詳審爰書累牘披閱靡遺少有可生  
之路立施法外之仁凡我百姓各宜孝親敬長畏罪懷  
刑以副朕仰法

皇考如天好生之意茲因諸王貝勒大臣文武官員人等  
僉謂天位不可久虛

宗社允宜早主再三陳請朕勉徇輿情暫抑悲痛於是月

二十日祇告

天地

宗廟

社稷即皇帝位以明年為雍正元年仰惟

先志之宜承深望

皇圖之永固適昭新化期衍舊恩於戲追慕

前徽繼述無忘於夙夜廣推

聖澤恩膏願被於寰區凡爾親賢文武其共矢蓋誠各輸

心膂用紹無疆之業永垂有道之庥布告天下咸使聞知

雍正元年三月二十五日江蘇巡撫奏請寬免蘆課等項銀兩奉

上諭江蘇等屬民欠地丁等項銀一百三十一萬餘兩內蘆課等項銀九萬八百兩零雖非恩詔內應行豁免之項但此事歷年最久倘行催徵窮民必致受累著一併豁免

雍正元年七月二十八日戶部以蠲免項內蘇太屬下衛所舊欠屯折等項錢糧請

旨奉

上諭未完屯折銀二萬四百九十餘兩內存留俸工銀一千二百九十餘兩雖不應豁免但此事歷年已久該撫既稱實係拖欠在軍著一併豁免

雍正元年八月十二日

諭兩江總督查弼納江南提督高其位署江蘇巡撫何天

培浙江巡撫李馥太湖三萬六千頃連跨數郡地勢既廣支流復多為盜賊出沒之所平時既易藏奸巡捕又難著力故蘇常盜案多於他省良善被擾官吏處分皆因太湖為之巢穴也爾等均有統轄之責可公同確議遴選賢員清查嚴緝俾匪類就擒餘黨解散日後作何稽察防範之法不使宵小復萌地方長享寧靜之福以副朕禁盜安民之意

雍正元年九月十六日戶部將江蘇所屬蘇太等

衛舊欠項下不應蠲免銀兩請

旨奉

上諭此民屯地丁等銀三百五萬九千餘兩內地租等項銀六千八百七十餘兩雖不應豁免但此事歷年已久實欠在民著一併豁免

雍正元年十月二十六日

諭戶部朕自御極以來宵衣旰食無日不以民依為念督撫以下守令以上凡有地方之責者均宜公忠體國仰



副朕心今年夏月朕以北省二麥歉收差員到南省於秋成後採買米石以備賑貸平糶朕意切於為民正欲酌盈劑虛以羨補不足也又恐有不便於民之處於差員臨行之時再三申諭地方米多方可採買不必定要買足今聞各省地方官因欽差買米禁止商販不許出境大負朕痼瘵一體之意甚屬不合况浙江及江南蘇松等府地窄人稠即豐收之年亦皆仰食於湖廣江西等處今秋成歉收若商販不通必致米價騰貴該部速

即行文各省總督巡撫凡有米商出境任便放行使湖  
廣江西安慶等處米船直到蘇州蘇州米船直到浙江  
毋得阻撓庶幾有無流通民皆足食以副朕愛養元元  
之意

雍正二年四月初九日

諭江南總督查弼納漕運總督張大有署理江蘇巡撫何  
天培朕惟漕運所經河道固以通國廩之輓輸亦以便  
商民之利涉旗丁與商民自應一視同仁無容偏護而

偏累也去年因秋冬雨少河流淤淺而旗丁人等不顧漕運維艱任意攬載客貨致船重難行聞今春丹陽常州等處地方及沿途遇淺槩拏商船起剝且借名需索貪暴公行得賄者雖空船亦行釋放不遂其欲者勒令當差有將貨物行李拋棄河干紛紛露積或為風雨所損傷或為盜賊所窺伺該管漕運文武官弁漫無約束毫不經心小民營販資生何以堪此擾害爾等係地方大吏皆當實心體恤稽察周詳奉諭之後或再有起剝

之事當各嚴飭所屬官弁申明約束不得仍蹈前轍並  
出示遍諭軍民人等使知朕一體軫恤之至意至張大  
有身任總漕糧艘往來乃其專責尤宜整肅綱紀釐奸  
去弊嚴明馭下毋使玩法犯科乃往往固執已見袒護  
下屬任其沿河盜賣漕糧兼倚勢藐法貽累地方甚屬  
不合今除已往不深究外嗣後若仍不加意約束屬員  
有心縱容及失於覺察再經朕訪聞定行嚴加議處其  
欽承毋忽

雍正二年六月初七日戶部奏江寧安徽福建陝西四省未完民欠與

恩詔年久應免之條相符者候  
旨豁免奉

上諭此事部議自康熙十八年至四十五年止舊欠銀米等項豁免著將五十年以前舊欠銀米等項俱察明豁免議奏

雍正二年八月二十四日

諭戶部前因江浙督撫等摺奏七月十八十九等日驟雨大風海潮泛溢衝決堤岸沿海州縣近海村莊居民田廬多被漂沒朕即密諭速行具本奏聞賑卹但思被災小民望賑孔迫若待奏請方行賑卹致時日耽延災民不能即沾實惠朕心深為憫惻著該督撫委遣大員踏勘被災小民即動倉庫錢糧速行賑濟務使災黎不致失所其應免錢糧田畝即詳細察明請蠲凡海潮未至之村莊不得混行濫冒至於緊要堤岸衝決之處務須

速行修築無使鹹水流入田畝朕念切痾瘵務令早沾  
實惠該地方官各宜實心奉行加意撫綏俾凋瘵得蘇  
生全速遂以副朕勤恤民隱至意爾部即行文各該督  
撫遵奉速行

雍正二年九月二十一日

諭江南浙江總督巡撫等今歲七月中颶風海潮泛溢江  
南浙江沿海州縣衛所堤岸多被衝塌居民田廬漂沒  
朕軫念深切已降諭旨令江浙地方官亟行賑濟撫綏

毋使災黎失所今被衝海塘若不及時修築恐鹹水灌入內河有礙耕種爾督撫等著即查明各處損壞塘工料估價值動正項錢糧作速興工至沿海失業居民度日艱難藉此傭役俾日得工價以資餬口是拯救窮民之法即寓其中矣將此再行飭諭務期實心遵旨速行以副朕憂恤元元至意倘有不肖地方官扣剋工銀及怠緩不力者該督撫嚴查即行題叅從重治罪

雍正二年九月二十一日河道總督齊蘇勒副總



督嵇曾筠各奏報黃淮秋汛情形奉

上諭擬奏黃淮二水經過秋汛工程平穩知道了齊蘇勒  
自補授總河以來實心効力與嵇曾筠各率屬員將各  
處堤工搶修保固雖河水泛漲堤工俱各無虞甚屬可  
嘉齊蘇勒著給與世襲拜他喇布勒哈番嵇曾筠著加  
三級齊蘇勒會同嵇曾筠將河工實在効力行走勤勞  
顯著之員察明造冊送部議叙

雍正二年九月二十二日

諭湖廣總督楊宗仁江西巡撫裴率度河南巡撫田文鏡  
山東巡撫陳世倌安徽巡撫李成龍今歲各省秋成大  
有惟浙江江南沿海地方七月十八九等日海潮泛溢  
近海田禾不無損壞朕軫念災黎惟恐失所業經嚴飭  
各省督撫發倉賑濟多方撫卹但蘇松杭嘉等府人稠  
地狹向來出米無多雖豐年亦仰給於湖廣江西及就  
近鄰省今沿海被災恐將來米價騰貴小民艱食湖廣  
江西地居上流河南山東二省接壤江南今歲俱各豐

收安徽寧太等府屬亦俱收成豐稔著動湖廣司庫銀  
買米十萬石江西司庫銀買米六萬石運交浙江巡撫  
平糶動河南司庫銀買米四萬石山東司庫銀買米六  
萬石安慶司庫銀買米五萬石運交蘇州巡撫平糶俱  
著速即辦理選委廉幹賢員陸續運送平糶銀兩仍移  
還補庫其米應於何地交卸湖廣江西督撫即咨會浙  
江巡撫河南山東安徽巡撫即咨會蘇州巡撫酌議速  
行務於蘇松杭嘉四府民人有益毋得怠緩遲誤

雍正二年十月初四日禮部議覆條奏江海等神  
應加封字號遣官致祭奉

上諭致祭禮儀宜極加虔敬其應封字號著敬慎選擬仍  
行文直隸山東江南浙江福建廣東督撫每省各查一  
江海大神廟將修理之處具奏

雍正二年十月二十日兩淮巡鹽御史奏報海潮  
衝決奉

上諭據奏七月內海潮衝決范隄沿海二十九場溺死竈

丁男婦四萬九千餘名口鹽地草蕩盡被漂沒朕心憫  
惻如同執熟著即動鹽課銀三萬兩委員分路賑恤務  
使得所不必該御史捐補其未完折價錢糧四萬餘兩  
悉行蠲免毋得仍稱帶徵名色致累現在窮丁該部遵  
旨速行至淮商運行鹽勸恐竈丁一時未能煎辦應作  
何接濟民食該部作速確議具奏

雍正二年十月二十五日

諭江浙兩省督撫提鎮江浙兩省沿海地方於七月十八

十九兩日皆被潮水漂沒居民廬舍雖經頒旨加意賑恤然朕憫惻之念至今尚未能釋惟有朝夕警惕以答天意但海為衆水所歸無不容納今乃狂潮泛溢水不循軌或者海洋潛藏匪類亦未可定稽諸前事往往有之沿海各省督撫提鎮務須實心愛養小民整理營伍俾閭閻各安其業汛防有備無虞毋令海洋別生事端庶不負朕委任之意

雍正二年十二月初四日

諭吏部尚書朱軾浙江沿海塘工最為緊要署巡撫石文焯前奏必須通用石塊修築後又奏稱不必用石全無定見誠恐貽誤塘工朕已諭令法海佟吉圖作速詳議具奏矣但恐法海等初任不諳地方情形爾曾為浙江巡撫必知海塘緣由著馳驛前往浙江將作何修築之處會同法海佟吉圖詳查定議交與法海等修築爾即回京朕思海塘關係民生必須一勞永逸務要工程堅固不可吝惜錢糧江南海塘亦為緊要爾浙江事竣即

至蘇州會同何天培鄂爾泰將查勘蘇松塘工如何修築之處亦定議具奏

雍正三年三月十九日管理戶部事務怡親王奏請酌減蘇松浮糧奉

上諭覽管理戶部事務怡親王所奏具見勤求民隱為國推恩之意正應戶部辦理之事蘇松之浮糧當日部臣從未陳奏常廩

皇考聖懷屢頒



諭旨本欲施恩裁減乃彼時大臣以舊額相沿已久國課所關綦重恐損上益下非理財之道數以不應裁減固執覆奏凡國家大事因革損益必君臣計議畫一始可舉行若

皇考違衆獨斷既非詢謀僉同之義且恐一時減免倘後來國用不足又開議論之端是以從衆議而中止然

聖慈軫念蘇松誕敷渥澤屢蠲舊欠以紓民力其數較他處為多是亦與裁減正額無異也今怡親王等悉心籌

畫斟酌奏請甚為可嘉朕仰體

皇考愛民寬賦之盛心准將蘇州府正額銀蠲免三十萬  
兩松江府正額銀蠲免十五萬兩論語曰百姓足君孰  
與不足周易曰損上益下民悅無疆朕但願百姓之足  
時存益下之懷用是特沛恩膏著為定例俾黎民輕其  
賦稅官吏易於催科可飭令該地方知之

雍正三年五月十六日奉

上諭朕軫念民生蠲租賜復不過行吾心之所安使斯民

共沾實惠並無一毫市恩之念欲以崇尚虛名也前蠲免江南蘇松兩府浮糧彼處士民感激朕恩為朕祈福聞有誦經立碑蓋造龍亭聚會演戲者雖或出於愛戴之誠然實非矢報君親之理朕所望於天下者祇欲各安職業端本務實以生以養庶幾家給人足共享昇平仰報我

皇考之付託耳以云祈報莫大於此至於誦經禮懺諸事皆為粉飾虛文即謂頌禱致虔亦於朕躬毫無所益且

聚衆演戲蓋造碑亭非徒糜費金錢兼恐有不肖官吏及里胥人等借名私派乾沒肥己貽累小民俱未可定此等陋俗

聖祖仁皇帝久已洞悉屢曾降

諭旨禁止及朕臨御以來曉諭天下人民務本重農力行節儉而聚衆演戲諸事更屬奢靡浪費蘇松士民習於華侈今又為此虛文以祈朕福甚非朕意朕實惡之著該督撫嚴行禁飭其碑亭建造之處槩行停止仍遍諭

士民各歸本業以副朕懷嗣後仍有此等浮華之舉朕必嚴懲以法

雍正三年五月十七日

諭戶部去歲江浙海潮衝溢沿海場竈淹沒之處甚多兩淮鹽政所屬地方經噶爾泰奏聞朕即發帑賑恤并將雍正元年二年竈戶未完折價銀四萬餘兩悉行蠲免其兩浙鹽政所屬地方該巡鹽並未將被災之處題報今謝賜履摺奏去秋海濤飄決情形兩浙與兩淮無異

朕一視同仁務使率土均霑膏澤著將華亭婁縣上海  
海寧餘姚蕭山慈谿等縣雍正元年二年未完場課銀  
兩悉行蠲免該鹽政通行曉諭俾各場丁戶人人得霑  
實惠將已未完場課數目確查報部倘有不肖有司將  
已完作欠或借端朦混私行重徵者即指名題叅若通  
同隱匿後經察出將該鹽政一併從重治罪該地方督  
撫仍嚴加稽察毋使吏胥中飽以副朕勤恤窮丁普濟  
同仁之至意爾部即遵諭行

雍正四年正月十二日奉

上諭據兩淮巡鹽御史噶爾泰奏稱衆商感戴保育生全賑卹蠲免之恩今鹽豐課裕商業已隆情願公捐銀二十四萬兩備交運庫又伊自己名下有應得銀八萬兩亦願報部撥解等語從前兩淮鹽課虧欠甚多自噶爾泰辦理以來歷年尚欠正項贏餘俱一一完納恤商裕課鹽政肅清甚屬可嘉朕前曾降諭旨令江南督撫酌議積穀以為備用今衆商公捐及噶爾泰奏請解部之

項共計三十二萬兩著將二萬兩賞給噶爾泰其三十萬兩可即為江南買貯米穀蓋造倉廩之用所蓋倉廩賜名鹽義倉即著噶爾泰交與商人經理如此則於地方積貯甚為有益而衆商急公之項亦得實濟著議政大臣大學士九卿詳議具奏噶爾泰著該部從優議叙其急公衆商行令噶爾泰分別造冊報部亦著議叙以示鼓勵

雍正四年二月二十九日



諭江蘇巡撫朕每見蘇松漕米虧空案內一經承名下侵蝕至二三千石訪問其故知糧重倉多之處州縣官不能兼顧聞點派收書經管收納所收民糧除丁兌外原有斛面餘米存留在倉遂有糧戶將應上米石私相折銀收書將餘米劃算迨收折既多倉內餘米不足以補而所收米價又已隨手花費以致虧空漕項此不可不嚴立條禁也嗣後收書有侵蝕漕米者該州縣詳叅後審究確實按其米數即照監守自盜律治罪為當并將

簽派收書之員題叅議處其侵蝕米石查明私折之糧  
戶著於各糧戶名下追補庶可懲滑吏而警愚民爾可  
議奏至各州縣所收倉糧丁兌之外倘有贏餘令該州  
縣報明存貯公所為修理常平倉廩之用再有餘剩歸  
入常平倉以佐賑濟該撫嚴飭蘇松二府各州縣實心  
奉行倘有借餘米名色加收斛面遺累小民者定行從  
重治罪決不少貸特諭

雍正四年十二月初十日奉

上諭今歲江南地方秋雨稍多其江安所屬被水之州縣已令該督撫轉飭有司確查賑恤務使小民得所但聞入冬以後時有陰雨積水未消春麥未能及時耕種恐交春米價漸昂而青黃不接之時更須預為籌及况蘇松戶口繁多民間食米多取給於外販尤當早為留意查江安糧道有存貯還漕一項約計二萬八千餘石安慶廬州鳳陽淮安四府各有分貯留漕之項共計九萬餘石此米原為地方備用而設但恐年月已久未必實

貯在倉應差京官一員前往確查並會同江南督撫作何分別留運平糶之法以濟民食但江南地廣人稠恐需米之處此數未必敷用必設法多貯方覺寬裕其應作何採買送運備用之處著九卿速議具奏

雍正四年十二月二十一日

**諭**戶部江南地方今歲秋冬雨水稍多低窪之處未免減收目前米價雖平恐明歲青黃不接之時價值不免昂貴朕心軫念預為籌畫已特遣專官將從前截留之米

一一清查會同該督撫商酌以濟地方之用又令該督撫動用正項錢糧委員於鄰省採買米穀以備積貯平糶之需朕思蘇松常鎮四府地廣人稠需米甚多而四府所屬漕兌共一百四十餘萬石居七省漕糧三分之一今州縣既有被水之區恐小民輸納匪易著將成災五分以上之地畝應出漕米緩徵一半約計將及二十萬石俾閭閻既寬正額之輸將而地方又有多餘之米粟則編戶窮黎當不慮其乏食矣其緩徵一半漕米著

於雍正五年秋收後帶徵完納其不成災之地畝仍照額徵之數准其紅白兼收著將此速諭該督撫遵行

雍正五年正月二十八日奉

上諭地方水利

恭紀河渠志

雍正五年二月初六日

諭兵部水師甚屬緊要現今天津設立水師滿洲官兵操練學習其江寧駐防滿洲官兵亦應照天津水師之例設立水師令其操練鎮江水師現有船隻將此船內酌

量撥給江寧將軍令其學習操練至如何操練應撥給  
船隻若干或船隻不敷作何添造之處爾部一併定議  
具奏

雍正五年六月初二日江蘇巡撫陳時夏奏報  
江水利工程告竣士民請建

萬壽碑亭奉

上諭朕以實心舉行實政全不好尚虛文如士民感恩建  
碑之事屢降諭旨嚴行禁止今因江南婁江水利工程

告竣士民具呈謝恩內有願鑄萬壽碑之語而巡撫陳時夏代為具題貼黃內並未將建碑字樣叙入明係欲從民請故本章內有意含糊甚屬不合可速止之

雍正五年九月十二日奉

上諭朕因直隸湖廣州縣數處近江臨河平時易於被水者今歲又經澇溢故降特旨將錢糧全行蠲免此乃軫念水鄉之民施恩格外而他處聞知遂生冀倖之意如固原地方六月偶遇冰雹而鍾保遂張大其事捏詞具奏



續據路振揚摺奏前來始知暫時驟雨帶有冰雹夏苗並未傷損秋禾發生茂盛今覽鍾保本章亦自稱勘不成災似此虛假衆所共見朕因人情如此是以聞江南浙江近水之地亦有數處被水未曾加以格外之恩然軫念窮民朕懷殷切著江南總督范時繹動用庫銀二萬兩於上下兩江應用之處散賑著浙江巡撫李衛動用庫銀一萬兩於應用之處散賑務選賢員辦理令窮民均沾實惠儻有餘剩銀兩著該督撫奏聞

雍正五年九月十六日雲貴總督鄂爾泰條奏江  
南三江水利事宜奉

上諭覽鄂爾泰所奏江南水道事宜甚屬周詳但摺內有  
越職陳奏字樣凡內外大臣越職辦事固為不可至若  
有關於國計民生者雖非已身職任之事既有見聞即  
當據實入告方合公忠體國之義此乃盡職非越職也  
如孔毓珣經過鳳陽地方即以水利情形奏聞朕甚嘉  
之鄂爾泰所奏著發與范時繹陳時夏齊蘇勒陳世倌

鄂禮就近詳加相度悉心妥議具奏

雍正五年十一月初十日奉

上諭自古治水之法惟在順其自然之勢而利導之蓋水之為害者大抵由於故道湮塞使水不得徑直暢流以致泛溢而為患但恐徑直之路湮塞年久或民間既已蓋造室廬開墾田畝或且安葬墳墓人情各顧其私不知遠大之計今見欲於此地開濬河道則因循規避百計阻撓而司其事者未免惑於浮議遂致遷就紆回別

開溝洫苟且從事而不能成一勞永逸之舉此治水之  
通弊也昨岳鍾琪奏稱陝西現在興修漢渠以濟民田  
亦以開濬之處不無礙於墳墓故爾遲回朕諭之曰果  
係民間墳墓所在當給與買地之價令其遷葬民自樂  
從岳鍾琪云若果給與遷葬之費則公私均便小民無  
不樂從者朕已諭岳鍾琪在陝遵行目今江南地方現  
在興修水利著該撫與欽差官員亦照此辦理若水勢  
必由之路有礙墳墓即於興修水利錢糧內動支銀兩

給與本人令其改葬俾小民既有營葬之資而河工亦收利導之益則水患可除水利可興地方永遠蒙福矣

雍正五年十二月十八日奉

上諭吳淞石塘當日勘估之時於海潮紆緩之處酌量修築土塘蓋因工程浩大諸臣勘估為節省錢糧起見故如此定議但東南財賦之區灌溉田畝保聚室廬全賴海塘捍衛朕思海勢衝激風濤旋轉難定土塘經歷年久未免可虞不若一例盡修石塘為百姓萬年之利似

為一勞永逸朕詢問齊蘇勒亦云甚當著陳時夏陳世  
官鄂禮等將現在土塘改築石塘之處確行勘估詳悉  
定議具奏不得惜費省工苟且塞責務須堅固永垂久  
遠以副朕經理海疆愛養民命之至意

雍正五年十二月二十日兩江總督范時繹奏報  
估計修濬太倉州河道工料銀兩奉

上諭據范時繹奏稱太倉州鎮洋縣士民僉稱境內劉河  
鉅工已蒙發帑開濬而七浦一河原係民田沾獲其利

今情願照依舊例業戶給食佃戶出力不敢再費帑金等語朕思君民原屬一體民間之生計即國計也倘遇國用不敷之時勢不得不資藉於民力今國家財用充足朕為地方籌畫萬年之利不惜多費帑金興修鉅工養育萬姓若仍用民力以辦公事非朕本心也况小民効力工程或致荒其本業而又不免官吏之督催煩擾朕心實為不忍昨蘇州一二有力之紳士懇請捐資以助地方之公事與此不同朕是以降旨准行著將范時繹

所奏士民捐助之處停止仍動用公帑辦理並將朕旨  
遍行曉諭該州縣士民伊等當體朕愛養元元之心於  
工程告成之後加意照看歲歲疏濬防護俾地方永受  
其益則勝於目前之趨事赴功多矣

雍正五年十二月二十八日奉

上諭朕因蘇松等處地方水利功程關係民生最為緊要  
特遣官員會同巡撫等悉心經理務期修築開濬以惠  
蒸黎凡工用所需悉發庫帑絲毫不以煩勞民力諭旨



頒布至再至三昨范時繹奏稱太倉鎮洋士民僉云劉  
河鉅工已費國帑其七浦一河工程民間情願出力以  
助修濬不敢再動帑金等語朕又復降旨嚴行禁止此  
中外所共知者頃聞長洲元和等縣有按照田畝科派  
銀兩之事朕思工費悉用帑金原以杜科派田畝之弊  
昨太倉等處士民懇請出力助工朕且嚴行禁止豈容  
不肖官吏按畝派費累及小民或者夫役等得受官價  
之外有田之業主幫貼飯食而不知者遂誤認以為按

畝派費亦未可定或者衙門之蠹役本地之攬頭借幫貼飯食之名派雜費以飽私囊亦未可定著范時繹陳時夏等通行曉諭令良善之民勿為奸猾所欺並時時訪察稽查除田主幫貼飯食外倘有胥吏攬頭等巧借名色科派分文者立即提拏重治其罪並將辦理工程之官員指名題叅從重議處倘官吏人等本無派費累民之處而本地居民或以工程礙伊室廬田土不願興修故捏造浮言以惑衆聽或奸民欲行包攬不遂其私

故傳播此語以阻撓公事則情罪甚屬可惡著范時繹  
陳時夏等確實查拏從重治罪

雍正六年二月十一日奉

上諭兩淮商人感戴朕恩急公念切數年以來將正項及  
帶銷銀兩俱照數全完又捐銀數十萬兩辦理地方公  
事甚屬可嘉今因揚州修濬水利工程又請公捐銀三  
十萬兩以佐公費朕聞之心甚不忍此衆商効力之處  
或係伊等力量寬舒實心踴躍合力捐輸以報國恩而

襄公事或係地方大臣官員等授意商人而有此舉著  
詢問衆商令其務將真情據實呈明該督再行具奏請  
旨

江南通志卷首三之一

欽定四庫全書

江南通志卷首三之二

世宗憲皇帝詔諭

雍正六年二月十九日江蘇巡撫恭報松江府華亭縣地方甘露呈祥奉

上諭據奏松江地方

天降甘露該省臣民皆以為朕之功德感召所致合詞頌祝等語夫甘露之瑞載在禮經自古以來咸稱嘉慶今

蒙

上天恩賜若不以為瑞非所以敬承

天貺也但此番未見於宮庭上苑而見於松江想因江南  
地方官員有惠政及民或本地民人風俗良善有上感  
天心之處是以錫茲瑞應昭示羣黎朕深為該地方稱慶  
若官民等歸美於朕朕不敢居也但願該地方官民紳  
士受

天恩賜倍勵虔恭官斯土者益厚其教養之道居是邦者

愈篤其忠孝之忱吏治清明民風醇厚則

上蒼眷佑錫福方來此則朕之深望也勉之勉之

雍正六年五月初九日

上諭高斌將澥墅關現行徵收則例據實陳奏請刊立木榜令衆商共曉遵依所奏甚屬可嘉部議令直省各關將各處現行徵收則例徹底清查據實奏聞刊榜曉示著各省兼理關務之該督撫並各關監督實力奉行毋得陽奉陰違虛應故事倘經接任之員察出定行交部

從重議處

雍正六年六月初六日河道總督奏報陳家渡壩

工奉

上諭據奏吳淞江陳家渡河渠有土埂三道未曾挑清致有停沙掛淤之患今建壩施工正在用力刮刷之際而江水海潮並長沙不能停將原有土埂檻限悉皆徹底刷淨毫無阻滯於河工大冇裨益知道了齊蘇勒自任總河以來實心供職即如吳淞江工程雖交與齊蘇勒



一同料理而實則范時繹陳時夏地方專辦之事乃范時繹陳時夏視之漠然而齊蘇勒一聞陳家渡壩工衝塌即親身前往踏勘悉心經理仰賴神佑水勢湧長以助人工將河道泥沙徹底刷淨水無阻滯工可告成此即封疆大臣實心為國為民感召

天和之明驗凡為大臣者當共知之齊蘇勒著交部從優議叙其在事官員著議叙具奏

雍正六年七月初二日奉

上諭戢盜乃安民之首務稂莠不剪則嘉禾不生奸宄不除則良善不安此一定之理朕時以此訓飭各省督撫有司諄諄往復而能實力奉行著有成效者甚少如江南蘇松等地方盜案多於他處而陳時夏等又復柔懦怠忽並未將積惡渠魁緝拏懲治范時繹居官廉謹然戢盜之才亦覺不足且管轄三省精神亦難周到是以下江地方盜風不能止息小民受其擾累朕深為屢念浙省盜案向來亦多自李衛蒞任以來留心整理匪類

知所畏懼昨據李衛奏摺內稱錢塘縣知縣秦炘杭協副將李燦拏獲積盜張寶生等十餘人審訊時供出歷年來圖財害命之案不可勝數似此兇惡害民之徒該督李衛能使文武屬員協力緝捕不致漏網人心共快又派委文武官弁分地巡查將盜賊拐逃假銀扒手賭博等犯嚴拏懲治以儆刁頑而安善類李衛實不愧封疆大臣之任甚屬可嘉著將江蘇所屬七府五州除錢糧刑名外其一切盜案俱交與李衛管理文武各官受

其節制有能盡心緝捕及疎防貽誤者聽其舉劾遇有緝捕訪拏盜賊等事各營兵弁聽其調遣江南督撫等官亦仍照舊辦理不得因李衛管理稽查盜案而生推諉之念至緝獲積賊之秦炯等著交部議叙

雍正六年八月十七日奉

上諭蝗蝻最為田禾之害然迅加撲滅猶可以人力勝之  
昔我

聖祖仁皇帝訓飭地方各官諄諄以捕蝗為急務其不力

者加以處分無非養民防患之至意乃州縣有司往往  
玩忽從事不肯實心奉行而小民性耽安逸憚於捕滅  
之勞且愚昧無知又恐捕撲多人以致踐傷禾黍瞻顧  
遲迴不肯盡力不知蝻子初生就地撲滅易於驅除一  
或稍懈聽其生翅飛揚則人力難施且至蔓延他境為  
害不可言矣前江南總督范時繹摺奏邳州地方有蝗  
蝻萌生朕即諭令竭力撲滅旋經該督奏聞該地方官  
已經撲盡比即批諭范時繹云撲盡之說朕實未信須

令有司實力奉行無俾遺種莫被屬員蒙蔽近聞彼處蝗蟲該地方官並未用力撲滅與朕前旨相符矣地方官如此怠玩從事而督撫尸位付之不聞是何理也著范時繹查明題叅並將該督撫交部嚴加議處以儆怠玩嗣後各省地方如有蝗蝻為害之處必根究其起於何地其不將蝻子即時撲滅之地方官著革職拏問若蝗蟲所到之地而該地方官玩忽從事不盡力撲滅者亦著革職拏問並將該督撫嚴加議處

雍正六年十月初四日奉

上諭向來江浙收兌漕糧俱用本地粳米擇其乾圓潔淨者方准交納遇收成稍薄之年該督撫每以紅白兼收為請朕皆允行夫米糧乾潔皆可久貯原不在色之紅白且江浙二省戶口繁多而每年應納漕糧將及四百萬石若必拘定本地粳米恐致米價昂貴民間難於輸將朕軫念閭閻凡有裨益民生之計皆為周詳籌畫嗣後江浙徵收漕米但擇乾圓潔淨不必較論米色准令

紅白兼收糶粳並納著為定例

雍正六年十一月三十日奉

上諭蘇州巡撫所屬七府五州自康熙五十一年起至雍正四年未完地丁錢糧積至八百一十三萬八千餘兩其中蘇松常三府太倉一州積欠最多自一百四十餘萬兩至一百八十餘萬兩不等朕念切民瘼凡閭閻疾苦周知洞悉此未完錢糧或有產去糧存而不能完納者或有人產已盡而無可催追者又或有從前遇歉收



之歲而地方官匿荒未報小民無力輸將致成拖欠者  
累積十餘年之久其數至千百萬兩但其中有或本係  
該地方官虧空而希圖卸脫捏作民欠者或糧戶已經  
交納而奸胥蠹役侵蝕入己仍作民欠者是此項未完  
大約官虧空者十之一二吏侵蝕者十之三四其實係  
民欠不過四五而已在貧窶之民固不能為無米之炊  
而官吏因緣作弊蠹國害民情罪可惡豈容令其脫然  
倖免若非徹底清釐即欲加惠於百姓其道無由是以

從前令張楷將江蘇民欠清查分晰張楷並不清查奏稱俱係民欠請分年帶徵朕雖姑允其請意甚未愜鄂爾泰於蘇州布政使任內實力稽查將有頭緒時以雲南巡撫職任綦重將鄂爾泰補授而清查之案又未竟其事後陳時夏到任之後一味怠忽疲玩毫無整理釐剔之心將從前分年帶徵之恩旨並不分限催追以一年應完之數細徵於一月之內以致小民艱於輸納地方官又奉行不善日事敲扑嚴比七府五州之黎庶不

得霑被恩澤朕心深為軫念乃陳時夏又奏稱蘇松積欠難於清結從前既蒙聖恩蠲免浮糧今請以舊欠之糧均派於新糧戶內分年徵收以抵補積欠夫蘇松浮糧朕仰承

皇考聖心每歲額免四十五萬兩煌煌明旨布告億兆豈有既蠲正額而復借此抵補積欠之理朕以誠信待天下臣民寧肯為巧詐之術乎且舊欠自有本人即非本人亦自另有著落若舍此不追而均派新糧是刁民因

積欠而得利良民因先輸而倍徵從此人人效尤誰復  
輸供正賦况以舊欠派入新糧舊欠未必全完而新糧  
又致欠缺此種狂悖之論不過因朕留伊在蘇州清理  
未完一時不能脫身而豪紳積蠹欲逞其抗糧之黠智  
為此邪說足以聳聽陳時夏亦藉此法或可草率完結  
為脫身卸責之私計耳陳時夏居心行事如此實深負  
朕恩今尹繼善現在清查但尹繼善初任封疆且茲事  
煩重非一人之心力所能辦理著將蘇松等七府太倉

等五州歷年帶徵地丁錢糧一槩暫停徵比俟朕派員  
前往與該地方官協理清查將各州縣官侵若干吏蝕  
若干實在民欠若干一一釐剔清楚朕當再降諭旨戶  
部即遵諭行文令該督撫遍行出示曉諭其派員分查  
之處著戶部詳悉定議具奏

雍正七年正月二十八日奉

上諭平治道路王政所先是以周禮有野廬合方之職自  
四畿達之天下掌其修治俾車馬所至咸蕩平坦易行

李輻輳津梁通達無雨水阻滯之累邇年以來廣寧門外已修石道其至通州運糧之路亦修整高潔往來行人頗為便利今直隸至江南大道車輪馬跡踐壓歲久致通衢竟成溝塹兩傍之土高出如岸一遇雨水之時衆流匯歸積潦難退行旅每苦泥濘或至守候時日朕心深為軫念但此通行大道已久成窪下勢難培築增高而大道之傍高阜甚多平治亦殊不易若於大道相近之處另開一道工力似屬易施其間或有地形斷續

之處應修建橋梁或有溝塍淤積之處應疏濬水道或  
所開之逕有借用民間田地者應補給價值並除錢糧  
或繞行之路有遠隔村莊旅舍者應引歸故道使有頓  
宿是非熟於相度地勢歷練道逕之人不能詳察妥當  
特派工部侍郎法保副都統韓光基原任護軍統領哈  
爾紀善二等待衛特庫四員於今年夏秋之交自京師  
起程由良鄉至宿遷大道一路踏勘將如何另開新道  
之處詳悉議定估計工費繪圖呈覽伊等起身之前朕

再降諭旨

雍正七年四月十七日奉

上諭從前清查江蘇等屬舊欠錢糧已經降旨將康熙五十一年至雍正四年未完地丁銀八百一十餘萬兩暫行停徵今思漕項等銀民間一例編徵不分款項若不槩行停比則錢糧難以清釐著將康熙五十一年至雍正四年漕項屯折等款未完銀二百八十一萬餘兩一體停徵王璣彭維新等可令各員於清查之時即分別



條款各歸各項俾數十年積欠其間官侵吏蝕俱得徹底清釐

雍正七年五月十三日奉

上諭向來有司官補授之時迴避本省蓋因地方密邇恐其中有嫌疑牽制等弊也朕思江南之上江下江湖廣之湖北湖南陝西之西安甘肅雖同在一省中而幅員遼闊相距甚遠定制各設巡撫司道以統轄之其情形原與隔省無異則官員選補不過有同省之名而並無

嫌疑牽制之處必須迴避况既係同省則於彼處人情土俗較他省之人更為熟悉未必不於地方有所裨益嗣後凡江蘇安徽湖北湖南陝西甘肅諸處府州縣以下官員得本省之缺不在本籍巡撫統轄之內者不必令其迴避其相隔在五百里之內者仍照隔省迴避之例一體遵行

雍正七年十月二十三日奉

上諭朕夙夜孜孜以吏治民風為念惟蘇松所屬糧賦浩

繁民欠累積官吏借此侵漁姦徒肆其包攬若不徹底清查則吏治難以整肅民風無由淳厚是以特命大臣總理清查之事又遴選大員專司分查之任再揀選州縣分派協理令其將官侵吏蝕民欠三項明晰清釐不得絲毫朦混又屢次降旨將蘇松等七府太倉等五州歷年帶徵地丁漕項錢糧一概暫停徵比俟各州縣官侵吏蝕及實在民欠一一釐剔清楚之後再降諭旨并令該督撫遍行出示曉諭是朕於清查一案已申示再

四可謂明白詳備矣乃承命之員奉行不善其始以為官侵無幾遂將紳衿所欠帶徵之項指為官侵以致姦胥蠹吏借端挾詐如松江候選州同朱榮椿者積欠錢糧九百餘兩而為蠹書訛詐亦至九百餘兩此其明驗也又聞不肖州縣有以里圖櫃書侵蝕之項將來難於歸著議令官戶富戶分派攤賠者又有將帶徵錢糧加一火耗以補官虧者其說雖未足盡信然人言籍籍總理其事者寧未聞之耶此皆由於承命之員不能深體

朕心而以徵比為清查之誤也設朕欲藉此為催徵錢糧之道從前又何以降旨停徵乎其有自願完納仍令地方官收受者緣浙江總督李衛來京陛見時奏稱江南舊欠錢糧自奉諭停徵之後凡有願完者州縣官恐涉先侵後吐之嫌槩不收受於民情頗有未便等語朕以民間凡有隱匿錢糧尚准其自首豈有願完舊欠而不准其輸納之理是以諭令戶部行文該總理清查大員知之乃不意奉行者遂借此為由將停徵之項槩行

催徵名曰勸輸而挨圖挨甲差役追呼甚於嚴比近見各員所奏有稱已完一百餘萬者有稱旬餘之內州縣完三萬餘兩者而溫而遜奏云此番清查首在勸其完納不徒在於造冊又聞朱鴻緒告人云鎮江一府舊欠二年内必令其全完是各員俱以完納錢糧為重而以清查官侵吏蝕民欠置之度外矣與朕簡命諸臣之旨不大相逕庭乎著將未完積欠槩行停徵其中或有官吏侵蝕今自首完納贖罪者聽其交庫外其餘民欠即

有情願交納者亦不准收受該總理之員務令分查協理各員恪遵前旨將官侵吏蝕民欠分別清釐無得絲毫朦混倘仍有私行徵納及將民欠內之官戶富戶掩蓋官吏侵蝕者該督撫及總理大臣即行指叅從重治罪倘該督撫等隱徇不舉或失於覺察經朕訪聞定將該督撫等一併交部嚴加議處又聞分查之員令各欠戶自行首報夫前旨之准令自首者乃侵蝕錢糧之官吏此等侵蝕之人本有應得之罪朕不忍其盡罹國典

是以令其據實自首則從寬免其治罪至於歷年積欠前已分年帶徵今又一槩停徵伊等又有何罪而令其自首乎總之各員卑鄙小見不知朕澄清吏治惠養小民之心而唯以錢糧為重朝廷之德意不能宣究於下司其事者寧無愧乎諭到著該督撫布政使即刊刻頒發所屬凡遠鄉僻壤悉行張掛使官吏紳衿軍民人等咸知朕意

雍正八年正月十二日奉



旨爾等議政處原議乍浦地方駐劄滿洲兵一千六百名  
此內挑選杭州餘丁八百名江寧餘丁四百名京城餘  
丁四百名令其披甲前往駐劄朕近詢問將軍鄂密達  
據稱江寧餘丁披甲者可得八百名等語今京城不必  
揀發四百名即於江寧餘丁內着鄂密達酌量挑選八  
百名令其披甲前往乍浦駐劄乍浦地方創設駐劄兵  
丁則補放管轄官員事殊緊要補放之員務將年富力  
強黽勉任事者揀選補授交與將軍鄂密達着於江寧

應補人員內揀補現任官員內應行調補者揀選調補如江寧應補之員不能足數於杭州應補人員內揀選補授現任官員內揀選調補之處著將軍鄂密達與將軍阿里滾互商派委此兩處補授員缺著各該將軍題補倘兩處不能足數著將數目開明報部該部請旨具奏再由京城揀選人員補授發往此駐防之官兵移居起程著交與江南總督范時繹浙江總督李衛公同商議料理起身欽此

雍正八年八月初九日內閣抄出奉

上諭向來蠲免錢糧額徵漕米不在所蠲之內朕思京通各倉米粟年來悉心經理已有餘積又有直隸營田所產稻米可以採買貯倉是京通倉儲有日增之勢今年山東地方被水稍重而直隸江南河南三省亦間有被水之州縣夫地方既已歉收則漕粟輸將未免竭蹶着將山東被水州縣之漕糧全行蠲免直隸江南河南被水州縣之漕糧按成災之分数蠲免其山東未被水州

縣應完之漕糧不必運送京師即留於東省以充兵餉  
如此則各該地方皆有多餘之米糧於民生大有裨益  
着直隸河南山東江南督撫遵照諭旨分別速行辦理  
務令妥協俾閭閻均霑實惠以副朕格外加恩之至意  
特諭

雍正九年七月二十二日內閣抄出奉

上諭今年五六月間直隸山東河南等處雨澤愆期朕即  
慮及上年被水低窪之地魚子存留今夏烈日蒸晒恐

變為蝗蝻為禾苗之患特令大學士等寄信與直隸山東督撫等嚴飭屬員留心體察預為防遏茲見沈廷正奏報山東濟寧州之南鄉新店等處有蝻子萌動在濱河荒草地方大抵是魚子變化而生已飭令文武員弁上緊撲滅等語又據張元懷奏稱光州所屬竹園內有青蟲蠶食竹葉未傷田禾其形似蝗今已捕除等語從來蝗蝻始生之時以人力制之尚易而小民耽逸偷安憚于用力又恐踐踏禾稼瞻顧逡巡及至飛颺之後遠

近蔓延而勢已不可遏矣是在實心任事之官員督率鄉民力為捕治不得姑順輿情釀成大患著直隸山東河南江南等處督撫通行所屬實力奉行倘視為具文苟且塞責將來飛颺之時朕必察其發生之處將該地方官從重治罪必不寬貸直隸山東河南三省欽差大臣科道等一同留心訪察毋忽特諭

雍正九年八月奉

旨從前降旨內外各省官民有實被我弟怡賢親王之德

澤誠心感激者准其建立祠宇以展其追慕之悃忱今  
遠近各省紳士軍民合祠懇請雖賢王美善于懿好之  
公異口同聲不謀而合朕思天下至大其傳聞王之令  
名而不親被王之恩惠者若一體建祠展祀則與朕之  
諭旨不符即王平日謙抑為懷亦不歆享也除畿輔之  
地王之功德理應俎豆千秋已降旨俞允建祠外奉天  
為

祖宗發祥之所仰蒙

福佑篤生賢王為國家宣猷佐政則俯順官民籲請建立  
祠宇情理為宜至于兩淮鹽務積弊多年自王總理戶  
部以來清一切之正供省多方之浮費弊端永杜苛累  
全除衆商咸沐恩膏萬竈皆成樂土再者江南戶口殷  
繁水利最關緊要王念切民生留心已久因伊屬下之  
李淑德曾任松江同知諳悉水道王訪聞明晰將一切  
興修事宜奏聞于朕朕本欲俟直隸工程就緒之後令  
王前往江南為萬民興久遠之利王亦身任不辭後以



國政贊襄不能速往旋據陳時夏之奏王奏請速行可  
以不必待臣親往朕因命李淑德前去會同督撫大臣  
等相度經營因勢利導今東南數千里河流疏通有灌  
溉之益而無泛溢之虞者實王創始之力也王之功德  
其顯著于江南者如此准予揚州地方建立祠宇一座  
以慰輿情浙江總督李衛前為戶部司官時朕不知其  
姓名王在朕前極力保薦謂其才品兼優可當大任御  
極以來王為國薦賢之處甚多而如李衛之深信力保

者內外不過數人朕因此將李衛屢加擢用至浙江總督李衛公忠敏達方正廉明易俗移風興利除弊浙人之深受李衛教養之益者皆王薦舉之功也准從浙人之請於杭州聖恩寺之側建立祠宇以申其感戴之誠其餘各省陳請建祠者俱不必行至大學士九卿議稱祠宇規模若於部文未到之先已經建造者無庸更改等語此言甚屬差悞各省督撫大臣豈有不俟諭旨而遽然舉行之理假若有之則其人之愚昧輕率可知更

不應准行圖並發欽此

雍正十年二月初三日

上諭前朕降旨令漕標及兩河標兵各添設一千名以實營伍隨經廷議行令總漕總河照馬四步六之例召募充補茲者浙江總督李衛來京陛見奏稱南方畜養馬匹甚難此時購買亦甚不易若仍照馬二步八戰守各半之例可以少畜馬匹而於營制亦合等語李衛所奏甚是可即傳諭總漕總河及河東總河俱照此辦理欽

此

雍正十年二月十三日內閣奉

上諭河標新募兵丁必須勤加訓練河道總督稽曾筠所辦河工事務甚繁難以專心督理訓練之事着協理河務西柱協同總河督率操演務令兵丁技勇嫻熟以實營伍欽此

雍正十一年正月十四日

上諭各省學校之外地方大吏每有設立書院聚集生徒

講文肄業者朕臨御以來時時以教育人材為念但稔聞書院之設實有裨益者少而浮慕虛名者多是以未曾勅令各省通行蓋欲徐徐有待而後頒降諭旨也近見各省大吏漸知崇尚實政不事沽名邀譽之為而讀書應舉之人亦頗能屏去浮囂奔競之習則建立書院擇一省文行兼優之士讀書其中使之朝夕講誦整躬勵行有所成就俾遠近士子觀感奮發亦興賢育才之一道也督撫駐劄之所為省會之地着該督撫商酌舉

行各賜帑金一千兩將來士子羣聚讀書須預為籌畫  
資其膏火以垂永久其不足者在於存公銀內支用封  
疆大臣等兼有化導士子之職各宜殫心奉行黜浮崇  
實以儲國家菁莪棫樸之選如此則書院之設有裨益  
於士習文風而無流弊乃朕之所厚望也特諭

雍正十一年五月

上諭上年江蘇等處被水之州縣朕已降旨多方賑濟今  
春又復添賑四十日以加惠貧民茲當徵收錢糧之時

其被災稍重之處遙念小民輸課未免艱難着該督撫秉公確查將應行緩徵之州縣奏聞緩徵待至秋成再令完納以紓民力以廣國恩特諭

雍正十一年七月

上諭上年江南松江地方潮水泛溢為災聞附近各鹽場內惟南匯縣之下砂各場奉賢縣之青村場被災稍重竈丁未免艱窘朕心深為軫念查下砂頭場二三場及青村場有本年額課銀兩又有歷年舊欠銀兩若令此

時照例徵收竈丁難於輸納着將本年額課緩至十月  
秋收後開徵其歷年舊欠之項分作三年帶徵以紓竈  
力可即傳諭程元章知之欽此

雍正十一年七月十一日內閣抄出奉

上諭聞上年秋月江南沿海地方海潮泛溢蘇松常州近  
水之人遭值水患其本地紳衿士庶中有雇覓舟船救  
濟者有捐輸銀米煮賑者今年夏間人有時症紳衿人  
等又復捐施方藥資助米糧似此拯災扶困之心不愧



古人任卹之誼風俗淳厚甚屬可嘉著該督撫宣旨褒獎仍遵前諭將捐助多者具題議叙少者給與匾額登記檔冊免其差徭並造冊報部特諭

雍正十一年七月十六日內閣抄出奉

上諭上冬今春之間北地雨雪稀少朕即恐夏月有蝗蝻之患曾切降諭旨通行直隸山東江南等省督撫大吏飭令所屬官弁先事預防不得苟且塞責續於五月間聞江南淮揚所屬之山陽寶應等處有蝻子萌動之機

朕又特降諭旨責令上緊捕治毋得稽緩嗣據魏廷珍奏報撲滅殆盡朕又復嚴切批諭之昨高其倬奏稱山東江南接壤之州縣蝗蝻尚未淨盡而州縣有司以地界兩省未免互相推諉朕又批諭高其倬曰若有司怠玩蝗患不除咎歸于汝朕之為民先事防維者亦殫竭心力矣今據王士俊奏稱從前曹縣魚臺兩縣蝻子生發臣已動支存公銀伍百兩多雇人夫撲滅淨盡近日濟寧官弁報稱該地方有蝻子生發之機亦已撲滅無

遺惟是隣近之江南豐沛碭山等縣尚有未盡倘或飛越入境即隨到隨除等語朕覽各督撫先後所奏是蝗蝻萌動之處山東江南二省州縣皆有之祇因彼此壤地相接不肖官吏遂謂可以卸過于鄰封而巧為推諉捕治不力情事顯然着傳旨速行曉諭倘餘孽未淨將來災及田禾定將兩省地方官均加嚴處其督撫等一併從重察議不稍寬貸特諭

雍正十一年十一月初四日内閣奉

上諭據魏廷珍奏稱江安蘇松糧道呈報本年漕米米色不純所屬之米俱屬如此無從更易等語朕思漕米正供必須乾圓潔淨方可起運抵通收貯經久今江安蘇松等屬本年漕米米色不純若濫行徵收則起運抵通必致霉變若勒令民間更換而民間所收又俱屬如此未免苦累可寄信與魏廷珍著會同高其倬徐本確查各屬如果米色不能純潔即將未徵漕米一面照部價改折一面奏聞似于江南民食甚有裨益欽此

雍正十一年十二月初九日奉

上諭本年江南應徵漕米朕已降旨密飭該督撫等以半本半折徵收為接濟民食之用惟是漕糧既一半改折則漕船亦應一半停運定例漕船減歇之年該運丁給與一半月糧以為養贍今於上年業已緩截本年又復減歇其行裝等項俱經預備於將次出運之時旋復停運則所領一半月糧或不敷用未免艱苦著將本年應支月糧等項悉行賞給此賞給銀米乃朕格外特恩嗣

後不以為例欽此

雍正十二年十月十一日內閣奉

上諭今年六月間江蘇地方雨水稍多州縣低窪之地有被水淹浸收成歉薄者朕心軫念且恐將來米價漸昂不可不預為籌畫着將乙卯年江南起運漕糧截留二十萬石於被水成災之州縣各就近留一萬石或五六千石於被水不成災之州縣量留三四千石俟開春市價增長之時將此平糶以便民用其成災田地應徵新

舊條銀若仍行徵輸小民不無竭蹶着緩至來年麥熟  
開徵再本年應納南漕等米亦緩至明秋折納所有被  
災地方無力乏食之窮民據該督等奏稱已動公項酌  
賞但冬春之際此等民人覓食艱難應動支倉穀分別  
賑濟毋令失所着該督撫悉心辦理並督率有司實力  
奉行務令均霑恩澤欽此

江南通志卷首三之二